



Հարգելի՛ ընթերցող.

ԵՊՀ հրատարակչությունը, չհետապնդելով որևէ եկամուտ, ԵՊՀ հայագիտական հետազոտությունների ինստիտուտի համացանցային կայքերում ներկայացնում է իր հայագիտական հրատարակությունները: Գիրքը այլ համացանցային կայքերում տեղադրելու համար պետք է ստանալ հրատարակչության համապատասխան թույլտվությունը և նշել անհրաժեշտ տվյալները:

ԱՐՏԱԿ ՄՈՎՄԻՍՅԱՆ



ՏԻԳՐԱՆ ՄԵԾ

ԹԱԳԱՎՈՐՆԵՐԻՑ ՄԵԾԱԳՈՒՅՆԸ

*Նա ցույց տվեց աշխարհին,
որ կարելի է դառնալ
արքայից արքա
ու մնալ բարեպաշտ...*

ԱՐՏԱԿ ՄԻՎԱՍՅԱԼ

ՏԻԳՐԱՆ ՄԵԾ

ԹԱԳԱՎՈՐՆԵՐԻՑ ՍԵՃԱԳՈՒՅՆԸ

ԵՐԵՎԱՆ
ԵՊՀ ՀՐԱՏԱՐԱԿԶՈՒԹՅՈՒՆ
2010

ՀՏԳ. 941 (479. 25)
ԳՄԳ. 63. 3
Մ 917

ՄՈՎՄԻՍՅԱՆ ԱՐՏԱԿ

Մ 917 «Տիգրան Մեծ. Թագավորներից մեծագույնը» / Արտակ Մովսիսյան. - Եր.: ԵՊՀ հրատ., 2010, 84 էջ:

Գրքում փորձ է արված հանրամատչելի շարադրանքով և հարուստ պատկերազարդումներով ներկայացնել ականավոր տիրակալ Տիգրան Մեծի կյանքն ու գործունեությունը: Աշխատանքը շարադրված է ըստ սկզբնաղբյուրների հաղորդումների և դրանց հիմամբ կատարված անաչառ հետազոտությունների:

Նախատեսված է Հայաստանի և Հին Աշխարհի պատմությանը հետաքրքրվող ընթերցող լայն շրջանակների համար:

ՀՏԳ. 941 (479. 25)
ԳՄԳ. 63. 3

ISBN 978 - 5 - 8084 - 1307 - 8

Մովսիսյան Ա.Ե., 2010 թ.

ՆԵՐԱԾՈՒԹՅՈՒՆ

*Տիգրան Մեծն իր արժանավայել տեղը պետք է զբաղեցնի Արևելքում երբևէ իշխան տիրակալների շարքում:
Նա արժանացել է «Մեծ» տիտղոսին պատվավոր մի կոչման, որը պատմությունը հազվադեպ է շնորհում իր ընտրյալ ղեկավարներին...
Տիգրանն իրեն դրսևորեց որպես աշխարհակալ և լուսավորիչ...*

Նիկողայոս Աղոնց

Յուրաքանչյուր ժողովուրդ իր պատմության ընթացքում ծնում է մեծերի, որոնք էլ դառնում են նրա խորհրդանիշ-կերպարները՝ հետագա սերունդներին ուղեկցելով և հզորություն հաղորդելով դժվարին իրադրություններում:

Այս միայն առավել քան տեղին է հնչում Տիգրան II Մեծի (Ք.ա. 95-55 թթ.) պարագայում, որը ոչ միայն դարձավ մեր պատմության խոշորագույն դեմքերից մեկը, այլև հետագա սերունդների հիշողության մեջ մարմնավորեց մեծ հաղթանակների և աշխարհակալության գաղափարն ու ոգին:

2005 թվականին լրացավ Հայոց մեծ տիրակալի գահակալության 2100 ամյակը, իսկ այս տարի լրանում է նրա ծննդյան 2150-րդ տարեդարձը: Ցավով պետք է նշել, որ այս տարեդարձներն առիթ չդարձան, որ քսանմեկերորդ դարասկզբին ապրողներս մեկ անգամ ևս վերաթեմվորենք մեր անցյալն ու ներկան՝ Տիգրանյան ոգով:

Տիգրան Մեծի անունը հայ իրականության մեջ ավելի շատ ներկայանում է «ծովից ծով Հայաստանի» մտապատկեր-կաղապարի տեսքով, որը մնում է չինաստավորված. մե-

գանում շատերն անգամ պատկերացում չունեն, թե ո՞ր ծովից ո՞ր ծովն է ձգվել Տիգրանյան Հայաստանը...

Տիգրան II Մեծի կերպարն իր ամբողջության մեջ մնում է չճանաչված, իսկ նրա մեծությունը՝ չգիտակցված: Թե ինչո՞ւ է այդպես, կարելի է մատնանշել բազմաթիվ պատճառներ: Դրանցից մեկն, անշուշտ, Տիգրան Մեծի մասին գիտահանրամատչելի գրականության գրեթե բացակայությունն է:

Այդ բացը լրացնելու նպատակով էլ որոշեցիմք բաց չթողնել Հայոց տիրակալի հորեյալանների պատեհությունը և մեր ժողովրդին մերկայացնել նրա մասին պատմող համրամատչելի ու պատկերազարդ մի գիրք, որը շարադրված կլինի պարզ լեզվով՝ հիմնված գիտական անաչառ ուսումնասիրությունների վրա:

Թե որքանով է դա հաջողվել, թո՛ղ դատի ընթերցողը:

Հուսով եմ, որ մեծ տիրակալի կերպարի իրական բացահայտումը կօգնի մեզ նաև հաղթահարելու թերաթեթեության այն բարդույթները, որոնք մեր ժողովրդի հոգեբանության մեջ մտել են իբրև հետևանք օտար լծի տակ անցկացված դարերի: Հայոց պատմության փառահեղ էջերի լուսարանումը մեզ կօգնի վերջնականապես հաղթահարելու մնաց բարդույթները և ապագային նայելու մեծ քաղաքակրթություն կերտած, փառքի ու վեհության բազում դարեր ապրած նախնիների ժառանգի աչքերով:

*Հայաստանի աշխարհակալության գաղափարը
հաստատուն կերպով զարգացավ
Տիգրանի ժամանակ:*


*Հաջորդ դարերում այս գաղափարը տիրող մնաց
հայերի մոտ, թեև քաղաքական հարաբերությունները
միշտ նույն գաղափարին չէին համընկնում:*

Հայնրիխ Գյուրշման

ՀԱՅՈՑ ՊԱՏՄՈՒԹՅԱԼ ԱՆՆԱՐԿԱԿԱՆՈՒԹՅՈՒՆՆԵՐԸ ՏԻԳՐԱՆ II ՄԵԾԻՅ ԱՌԱՋ ԵՎ ՀԵՏՈ

Հայոց պատմության ընթացքում գոյություն են ունեցել մի քանի աշխարհակալություններ: Դեռևս Ք.ա. XXVIII-XXVI դարերում Հայկական լեռնաշխարհի մշակույթը տարածվում է շատ մեծ հեռավորությանը, ինչը հնարավոր չէր առանց հզոր պետականության: Հարավ-արևմուտքում այն հասնում է Սիրիա և Պաղեստին, հարավ-արևելքում՝ Իրանի կենտրոն, իսկ հյուսիսում՝ միջև Հյուսիսային Կովկաս:

Այս ժամանակաշրջանից մեզ հասած գաղափարագիր-նշանները դեռևս չեն վերծանվել: Հնագիտական պեղումների շնորհիվ հստակորեն երևում են հայաստանյան մշակույթի ծավալումն ու սահմանները, որոնք ընդգրկում են շուրջ մեկ միլիոն քառակուսի կիլոմետր տարածք: Անանուն արքաների այս աշխարհակալությունն առաջինն է հայոց պատմության մեջ: Սա աշխարհի առաջին մշակութային աշխարհակալությունն է...



*Քարտեզ 1.
Հայաստանի
վաղ բրոնզի
դարաշրջանի
«մշակութային
աշխարհակա-
լությունը»*



Քարտեզ 2. Հայկական լեռնաշխարհի 17 «երկրների» տիրույթները (Կոտիական համադաշնության տերությունը)

Այնուհետև Ք.ա. XXIII-XXII դարերում Հայկական լեռնաշխարհի 17 երկրների համադաշնությունը Կոտիական (Կորդվաց) աշխարհի գլխավորությամբ իշխում է Առաջավոր Ասիայի մեծ մասի վրա, ինչը տևում է շուրջ 100 տարի:

Ք.ա. IX դարի վերջին քառորդում Իշպուրի աբբայի անցկացրած ռազմական, կրոնական և այլ բարեփոխումների շնորհիվ անշեղորեն սկսեց իզդրանալ Վանի թագավորությունը (Նաիրի-Քիսայնիի-Արարատ-Ուրարտու): Նրա որդի Մեմուա արքայի օրոք (Ք.ա. մոտ 810-786 թթ.) այն վերածվեց աշխարհակալության՝ հաղթանակներ տոնելով տարածաշրջանի գերտերության՝ Ատրեստանի նկատմամբ:

Արգիշտի I-ի (Ք.ա. 786-864 թթ.) և Սարգուրի II-ի օրոք՝ մինչև Ք.ա. 740-ական թվականների վերջը Վանի տերությունը գերիշխում էր Առաջավոր Ասիայում:

Հայկական լեռնաշխարհին և շրջակա տարածքներին իշխելուց հետո Արգիշտի I-ը Ջագրուսի լեռներով դեպի հարավ հաղթարշավով նվաճեց Բաբելոնիան (Բաբելոն երկիրը)՝ մինչև Պարսից ծոց: Իսկ նրա անվամբ արձանագրված սահմանադրությունը ե՛ն գտնվել Հյուսիսային Կովկասից, Արխազիայից, Օսեթիայից և Թռեղից (Ջավախքի հարևանությամբ):

Ք.ա. VIII դարի կեսերին, զարգացնելով իր փառապանմանախորհի հաջողությունները, Սարգուրի II-ը տերության սահմանները հասցրեց չորս ծովերի ափերին:

Վանի թագավորությունը տարածաշրջանային գերտերության դերակատարում է ունենում մահ Ք.ա. VII դարում՝ Ռուսա II-ի իշխանության օրոք:



Քարտեզ 3. Վանի տերությունը (Նաիրի-Քիսայնիի-Արարատ-Ուրարտու)



*Նկար 1.
Լևոն Մեծագործի կնիքը՝
Կիլիկյան Հայաստանի
զինանշանով*

Վանի տերությունից հետո մեր պատմության մեջ նշանավորվում է Տիգրանյան աշխարհակալությունը, որին հանգամանորեն կանդրադառնանք առաջիկա էջերում:

Աշխարհակալության գաղափարը չի լրում մեր նախնիներին մաս միջնադարում: Բագրատունյաց հայոց թագավորության սկզբնական ժամանակաշրջանում մեր արքաների իշխանությունը բացի բուն Հայաստանից տարածվում էր Վրաստանի, Արվանդի, Աբխազիայի վրա՝ հասնելով Հայկական Տավրոսից մինչև Մեծ Կովկասի լեռները:


Ավելի ուշ Կիլիկիայում ստեղծված հայկական պետությունը բազում հաղթանակների հասավ ժամանակի հզոր պետությունների նկատմամբ՝ կատարելով մաս տարածքային նվաճումներ: Լևոն II (իբրև արքա՝ Լևոն I) Մեծագործը հռչակվեց «թագավոր աննայն Հայոց և նահանգին Կիլիկեացոց և Իսավրիո», ինչու՛մ արտացոլված էր համահայկական պետությունը վերականգնելու և տերության վերածելու ծրագիրը:

Այս ամբողջից, սակայն, մեր ժողովրդի հիշողության մեջ հատկապես տպավորված է Տիգրան Մեծի տերությունը: Ինչո՞ւ է այդպես:

Հասկանալու համար այս հարցի պատասխանը՝ անդրադարձ կատարենք Տիգրանյան դարաշրջանի իրադարձություններին:

ԱՇԽԱՐՀԱՔԱՂԱՔԱԿԱՆ ԻՐԱԳՐՈՒԹՅՈՒՆԸ ՏԻԳՐԱՆ II-Ի ԳԱՀԱԿԱԼՈՒԹՅԱՆ ՆԱԽՕՐՅԱԿԻՆ

Հոտնական գորբերը Ք.ա. II դարի վերջին և I դարի սկզբին շարունակում էին առաջխաղացումը դեպի արևելք: Արևելքում Ալեքսանդր Մակեդոնացու տերության գլխավոր ժառանգորդ Սելևկյան պետությունը կորցրել էր իր երբեմնի հզորությունը: Նախկին հզորությունը կորցրել էր նաև Մակեդոնացու տերության մյուս ժառանգորդը՝ Եգիպտոսի Պտղոմյան թագավորությունը:



*Նկար 2.
Հոտի խորհրդանիշ
մայր գաղթը՝
թագափ հինմադիր
երկվորյակներին
կերակրելիս*

Փոխարենն Առաջավոր Ասիայում հզորացել էին Պոնտական և Պարթևական թագավորությունները: Պոնտոսում իշխում էր Միհրդատ VI Եվպատորը, որը Սև ծովի ավազանում ստեղծել էր մեծ պետություն:

Պարթևական թագավորությունը, որտեղ իշխում էր Միհրդատ II Մեծը, արևելքում տարածվում էր մինչև Հնդկաստան, իսկ արևմտյան սահման էր դարձրել Եփրատ գետը:

Առաջավոր Ասիայում շարունակում էր հզոր մնալ Մեծ Հայքը, որտեղ իշխում էին Արտաշես I-ի ժառանգները:

ԱՐՔԱՅԱԶՆ ՏԻԳՐԱՆԸ

Տիգրան Մեծը ծնվել է Ք.ա. մոտ 140 թվականին, հավանաբար, մայրաքաղաք Արտաշատում: Նրա մանկության և պատանեկության մասին մենք ոչինչ չգիտենք, թեպետ միանշանակորեն կարելի է ասել, որ նա դաստիարակվել է ժամանակի լավագույն ուսուցիչների կողմից:

Ք.ա. մոտ 120-115 թթ. Պարթևստանի և Մեծ Հայքի միջև սկսված պատերազմն անհաջող է ավարտվում Մեծ Հայքի համար, որը, սակայն, շարունակում էր հզոր մնալ: Պարթևները զգուշանալով, որ հայերը շուտով վրիժառու պատերազմ կսկսեն, պատանդ են պահանջում: Եվ 20-25-ամյա արքայզն Տիգրանը պատանդ է տարվում Պարթևստան:



Նկար 3. Մի հատված մայրաքաղաք Արտաշատից

Այդ ժամանակաշրջանի հայ-պարթևական հարաբերությունների մասին ունենք հույն մատենագիր Ստրաբոնի վկայությունը.

ՊԱՏԱՍԿԱՆ ՏԵՂԵԿԱՆՔ

Պարթևները տիրեցին մարերի ու բարելացիների երկրներին, բայց ոչ Չայաստանին: Թեև հաճախակի հարձակումներ եղան, բայց երկիրը չնվաճվեց:

ՍՏՐԱԲՈՆ,
հույն մատենագիր(Ք.ա. 1-1 դարեր)

Պարթևական պատանդության մեջ հայոց արքայզնն ուներ հատուկ կարգավիճակ, որն ուսումնասիրողները հաճախ կոչում են «պատվո պատանդություն»: Դրա մասին է վկայում հենց այն փաստը, որ նրա դուստր Արիազատա-Ատոտման ամուսնացել էր Միհրդատ II Մեծի հետ և դարձել Պարթևստանի քագուհի:



Նկար 4.
Պարթև արքա
Միհրդատ II Մեծի
դրամներից

Հարևան երկրի արքայզնին պատվո պատանդության կարգավիճակում պահելն ապահովագրումից բացի ուներ մեկ այլ հիմնական նպատակ՝ դարձնել նրան իրենց պետությանը համակիր գործիչ:

Տիգրանի դեպքում պարթևները չարաչար սխալվեցին...

ՊԱՏԱՆԳ-ԱՐՔԱՅԱԶՆԻ ՎԵՐԱԳԱՐՉՆ ՈՒ ԹԱԳԱԳՐՈՒԹՅՈՒՆԸ

Ք.ա. 95 թ. հայոց արքայի մահվանից հետո Տիգրանը վերադառնում է Հայաստան: Որպես վերադարձի պայման նա պարթևներին կատարում է տարածքային զիջում՝ «Յոթանասուն հովիտներ», որը որոշ գիտնականներ համարում են այդ անվամբ շրջան, իսկ ուրիշները՝ 70 գետահովիտներից բաղկացած տարածք հայ-պարթևական սահմանագրումում:

Տիգրանը վերադարձավ Հայաստան 45 տարեկանում: Նա կյանքի առաջին կեսն անց էր կացրել Հայաստանում՝ լիովին ձևավորվելով որպես հայկական շահերին նվիրված պետական ու քաղաքական գործիչ, իսկ երկրորդ կեսը՝ պարթևական աշխարհակառույցյան արքունիքում: Վերջին հանգամանքը, քերես, նպաստել էր նրա՝ իբրև աշխարհակալի մտածողության զարգացմանը:


Աշխարհակալի մտածողությունը երևում է նրա առաջին իսկ քայլերից: Հայաստան վերադառնալով՝ արքայազն Տիգրանը թագադրվում է մի վայրում, որը ոչ երկրի մայրաքաղաքն էր, ոչ հոգևոր կենտրոնը, ոչ էլ հատուկ թագադրավայր (ինչպես, օրինակ, Տարսոնը Կիլիկյան Հայաստանում): Դա այն վայրն էր, որտեղ թագադրությունից շուրջ երկու տասնամյակ անց Տիգրան Մեծը պիտի կառուցեր իր աշխարհակառույցյան նոր մայրաքաղաքը:

Իսկ դա նշանակում է, որ մինչև Հայաստան մտնելը Տիգրանն արդեն իսկ ծրագրել էր ապագա մեծ տերության ստեղծումը, իր մտապատկերում ուներ տերության սահմանների ուրվագիծը, որի կենտրոնական շրջանում էլ հետագայում պիտի կառուցեր մեծ մայրաքաղաքը:

ԾՈՒՔԻ ՎԵՐԱՄԵՎՈՐՈՒՄԸ ՄԵՏ ՀԱՅՔԻՆ ԵՎ ՀԱՅ-ՊՈՐՏԱԿԱՆ ԳԱՇԻՆՔԸ

Քաղաքական լուրջ ծրագրեր ունեցող արքայի առաջին խնդիրն անհրաժեշտաբար պետք է լիներ Մեծ Հայքի թագավորության վերամիավորումը: Նրա պապ Արտաշես I-ին չէր հաջողվել վերամիավորել Ծոփքի թագավորությունը Մեծ Հայքին, և այն մնացել էր անկախ: Իր իշխանության սկզբնական շրջանում Տիգրան II-ը պարտության մատնեց այնտեղ իշխող Արտանես Երվանդունուն և Ծոփքը վերամիավորեց Մեծ Հայքին:

Հայկական բոլոր հողերը մեկ միասնական պետության մեջ միավորման գործընթացի տրամաբանական շարունակությունը պետք է լիներ Փոքր Հայքի միավորումը, ինչն այս ժամանակաշրջանում հնարավոր չեղավ:



Նկար 5. Տեսարան Ծոփաց աշխարհից (Արածանիի հովիտը)

ՊԱՏՄԱԿԱՆ ՏԵՂԵԿԱՆՔ

Արտաշեսի շառավիղը էր Տիգրանը, որն ուներ այսպես կոչված բուն Չայաստանը. այն հարակից էր Սեդիային, Արվանդներին և Իբերներին, մինչև Կոլխիս ու Եվքսինյան Կապադովկիա: Իսկ Ջարեհի շառավիղը էր Արտանես Ցուփացին, որն ուներ հարավային, առավելապես, արևմտյան մասերը: Տիգրանը հաղթեց նրան և ինքը դարձավ այդ բոլոր երկրների տերը:

ԱՏՄԱՐՈՆ,

հույն մատենագիր(Ք.ա. I - I դարեր)

Պատճառն այն է, որ Ք.ա. մոտ 112 թ. Փոքր Հայքի արքա Անտիպատրոս Երվանդունին, լինելով անժառանգ, կտակել էր Փոքր Հայքը Պոնտոսի արքա Միհրդատ VI Եվպատորին, որը սկսել էր կրել «թագավոր Պոնտոսի և Հայոց» (իմա՝ «թագավոր Պոնտոսի և Փոքր Հայքի») տիտղոսը: Մա հինը ընդունելով՝ մասնագիտական գրականության մեջ արտահայտվել է կարծիք, ըստ որի՝ Միհրդատ Եվպատորը ևս կառող էր սերել Հայկազուն-Երվանդականների տոհմից:



Նկար 6
Միհրդատ VI
Եվպատորի
կիսանդրին

Սև ծովի ավազանում ստեղծելով գերտերություն՝ Միհրդատ Եվպատորը նպատակ ուներ Հռոմին դուրս մղելու Փոքր Ասիայից և Հունաստանից: Այսինքն՝ նրա ծրագրերը կապվում էին արևմուտքի հետ, որտեղ Տիգրան Մեծն առանձնակի քաղաքական հետաքրքրություններ չուներ: Նրա աշխարհակալական ծրագրերը կապվում էին Հայաստանից հարավ-

արևմուտք, հարավ և արևելք ընկած տարածքների հետ, ինչը չէր խանգարում Միհրդատ Եվպատորին: Երկու երկրներին էլ պետք էր ապահովվադրել իրենց բիկունքը, մասնավորապես, որ իրենց ծրագրերի իրականացման ճանապարհին նրանք բախվելու էին այնպիսի գերտերությունների հետ, ինչպիսիք էին Հռոմն ու Պարթևստանը: Այսպիսի աշխարհաքաղաքական պայմաններում Տիգրան II-ն ու Միհրդատ Պոնտացին Ք.ա. 94 թ. կնքում են դաշինք, որն ամրապնդվում է 46-ամյա Տիգրան II-ի և նրանից մոտ 30 տարով փոքր Միհրդատ Եվպատորի դուստր Կլեոպատրայի ամուսնույթյամբ:

ԿԱՊԱԿՈՎԿԵԱԿԱՆ ԱՌԱՋԻՆ ԱՐՇԱԿԱՆՔԸ

Կնքված դաշինքի առաջին գործնական դրսևորումը եղավ Ք.ա. 93 թ. հայ-պոնտական զորքերի կողմից Կապադովկիայի նվաճումը: Վերջինիս արքա Արիարաթես Հռոմեաները փախուստի դիմեց Հռոմ: Նվաճված տարածքը, պայմանավորվածության համաձայն, անցավ Պոնտոսին, իսկ ամբողջ շարժական գույքը Տիգրան II-ն որպես ռազմավար բերեց Հայաստան:

Կապադովկիան Հռոմի քաղաքական ազդեցության տակ գտնվող թագավորություն էր, ուստի հռոմեական բանակները շտապեցին վերականգնել Կապադովկիայում նախկին դրությունը:

Ժամանակին անտիկ պատմագրության մեջ շրջանառվել և նոր ժամանակների պատմագիտության մեջ բազմից կրկնվել է այն միտքը, թե, իբր, Միհրդատ Եվպատորը կարողացել է ուղղորդել Տիգրան Մեծին և օգտագործել իր նպատակների համար: Որպես օրինակներ վկայակոչվել են մաս կապադովկիական այս և հետագա արշավանքները:

Մակայն պատմական ամփի լայն կտավի վրա մի փոքր ուշադիր բնեկով՝ դժվար չէ հասկանալը, որ Կապադովկիայի դեմ արշավանքները միանշանակորեն բխում էին Մեծ Հայքի



Նկար 7. Տեսարան Կապադովկիայից

շախերից: Խնդիրն այն է, որ դեռևս Արտաշես I-ի (Ք.ա. 190-160 թթ.) իշխանության վերջին շրջանում Ծոփքի՝ Մեծ Հայքին վերամիավորմանը խոչընդոտեց հենց Կապադովկիան: Դա թույլ է տալիս ենթադրելու, որ այդ պետությունը մույնդիսի դիրք պետք է գրաված լիներ Ք.ա. 94 թվին՝ Տիգրան II-ի կողմից Ծոփքի վերամիավորման ժամանակ, մանավանդ որ, իբրև Հռոմի կամակատար, Կապադովկիան ամեն կերպ պետք է խոչընդոտեր Արևելքում նոր պոտենցիալ հակառակորդի՝ Մեծ Հայքի հզորացմանը: Մյուս կողմից Տիգրան II-ը կապադովկիական արշավանքներով լուծում էր ռազմավարական կարևոր խնդիր՝ Պոնտոսի միջոցով փակելով դեպի արևելք ծավալվող Հռոմի ճանապարհը:

ՀՌՈՄ-ՊԱՐԹԵՎԱՍԱՆ ԳԱՇԻՆՔՆ ԸՆԳԳԵՏ ՄԵՏ ՀԱՅՔԻ ՌԻ ՊՈՆՏՈՍԻ

Ք.ա. 92 թ. Եփրատի ափին կնքվեց հռոմեա-պարթևական դաշինք, որով երկու տերությունների ազդեցությունների

որոտի սահմանագիծը պետք է դառնար Եփրատ գետը: Այն ուղղված էր ընդդեմ Մեծ Հայքի ու Պոնտոսի:

Ինչո՞ւ վաղեմի բշնամիները որոշեցին դաշնակցել:

Հռոմի դեպքում դա հասկանալի էր՝ Միհրդատ Եվպատորի նպատակաուղղված հակահռոմեական գործունեությունը և հայ-պոնտական ուժերի կողմից իր ազդեցության գոտում գտնվող Կապադովկիայի գրավումը:

Սակայն ինչո՞ ստիպեց պարթևներին կնքել այդ դաշինքը: Պոնտոսը շատ հեռու է Պարթևստանից և երբեք սպառնալիք չի եղել վերջինիս համար: Նշանակում է՝ պարթևները կնքեցին այդ դաշինքը Հայաստանից պաշտպանվելու նպատակով:

Կարծիք կա, որ Տիգրան II-ը ռազմարշավ էր իրականացրել Պարթևստանի դեմ և հետ ստացել պատանդության դիմաց զիջված հայրենական «Յոթանասուն հովիտներն» իշխանության հենց սկզբնական շրջանում: Դա շատ հավանական է, մանավանդ, եթե նկատի ունենանք Ստրաբոնի ուշագրավ հետևյալ տեղեկությունը.

ՊԱՏԱՎԱՆ ՏԵՆԵՎԱՆԸ

Տիգրանը փոփոխական բախտ է ունեցել, քանզի նա սկզբում պատանդ է եղել պարթևների մոտ, այնուհետև պարթևները որպես վարձ ստանալով յոթանասուն հովիտներ Դայաստանից, նրան վերադարձնում են գահը: Նա հզորանալով, թե այդ վայրերը ետ վերցրեց և թե նվաճեց նրանց երկիրը Նինվեի և Արբելայի շուրջը: Նա հպատակեցրեց նաև Ատրպատականը և Կորդուքը և սրանց հետ նաև մնացյալ Միջագետքը: Բացի այդ, անցնելով Եփրատը, նա ուժով նվաճեց Ասորիքը և Փյունիկեն:

*ՍՏՐԱԲՈՆ,
հույն մատենագիր(Ք.ա. I- I դարեր)*

Միջազգետրի գրավումը երկու փուլով (նախ՝ Նիսիվի և Արբելայի շրջանը, ապա՝ «մնացյալ Միջազգետրը») մղում է մտածելու, որ խոսքը երկու պատերազմների մասին է: Առաջինի արդյունքը «Յոթանասուն հովիտների» վերամիավորումն ու Ադիաբենե երկրի (Նիսիվի և Արբելայի շրջանի) գրավումն էր, իսկ երկրորդինը՝ ողջ Միջազգետրի գրավումով Տիգրանյան տերության հարավային սահմանը Պարսից ծոց հասցնելը: Վերջինս, բնականաբար, պետք է լինի Ք.ա. 87 թ. մեկնարկված պարթևական մեծ արշավանքը, ուստի կարելի է եզրակացնել, որ առաջինը տեղի է ունեցել ավելի վաղ՝ Ք.ա. 94-92 թթ. ընթացքում: Հենց դա էլ պետք է դրդեր պարթևներին Հռոմի հետ դաշինք կնքելու:

Կա կարևոր մի փաստ ևս:

Գիտական գրականության մեջ բազմիցս տարակուսանք է հայտնվել Տիգրան Մեծի կողմից Մելիկյան պետությանը (որի միջուկը Ասորիքն էր) տիրելու մասին տվյալների հակասության առնչությամբ: Մի կողմից նշվում է, որ Ք.ա. 83 թ. նա հրավիրվել է Անտիոք և գահին բազմել առանց մեկ զինվոր կողոնելու (տե՛ս ստորև), մյուս կողմից նշվում է, որ նրան ցույց է տրվել ռազմական լուրջ դիմադրություն:

Խնդիրը փորձել են բացատրել՝ ենթադրելով, որ Ասորիքում գոյություն են ունեցել ռազմաքաղաքական երկու հակադիր կուսակցություններ: Սակայն մնան բացատրությունը ճիշտ կլինե՞ր, եթե հայոց արքային հրավիրելն ու նրան դիմադրելը տեղի ունեցած լինեին միաժամանակ: Մյու՛ղե՛ն ըստ Ապպիանոսի՝ Տիգրան II-ի դեմ պատերազմել և նրանից պարտություն է կրել Անտիոքոս X Եվսեբոսը, որն իշխել է Ք.ա. 95-92 թվականներին: Սա նշանակում է, որ հայոց արքայի սելևկյան առաջին արշավանքը պետք է տեղի ունեցած լինի մինչև Ք.ա. 92 թվականը (ներառյալ): Ամենայն հավանականությամբ, այստեղ գործել է դաշնակիցների համաձայնեցված գործողությունների ծրագիրը. կապաղովկիական առաջին արշավանքից հետո Միհրդատ Եվպատորը գրավեց Բյուրանիան, իսկ Տիգրան II-ն արշավել է Մելիկիայի դեմ:

Դա էլ, թերևս, արագացրել է հռոմեա-պարթևական դաշինքի կնքումը:

Թե ինչո՞ւ Ասորիքում Ք.ա. 92 թ. չի հաստատվել Տիգրան II-ի իշխանությունը, կարելի է միայն ենթադրություններ անել: Փաստ է, սակայն, որ հայոց արքան այդ թվականին հանրել և գահընկեց է արել Անտիոքոս X Եվսեբոսին, որի ազգականները հետագայում կհայտնվեն Տիգրան Մեծի դեմ ձևավորված հռոմեական ճամբարում:

Փաստորեն, Ք.ա. 95-92 թվականները Տիգրան II-ի համար եղել են կարևոր իրադարձություններով խիստ հազեցած տարիներ: Շոփրի վերամիավորումից և հայ-պոնտական դաշինքի կնքումից հետո Մեծ Հայքի արքան Միհրդատ Պոնտացու հետ համատեղ իրականացրել է կապաղովկիական առաջին արշավանքը, իսկ միայն իր ուժերով՝ **պարթևական և սելևկյան առաջին արշավանքները**:

Հավանաբար, հենց այդ ժամանակ էլ (եթե ոչ ավելի վաղ) Վիրքն ու Աղվանքն ընդունել էին հայոց արքայի գերիշխանությունը:

ԿԱՊԱԳՈՎԿԻԱԿԱՆ ԵՐԿՐՈՐԴ ԱՐՇԱՎԱՆՔԸ

Ք.ա. 91 թ. հայկական գործերը երկրորդ անգամ են արշավում Կապաղովկիա և ռազմակալում այն: Հետաքրքիր է, որ երկու արշավանքների ժամանակ էլ, ըստ պայմանավորվածության, Կապաղովկիայի տարածքն անցնում էր Պոնտոսին, իսկ ողջ շարժական գույքը (նսկայական ռազմավար և շուրջ 300 հազար զերիներ) անցնում էր Մեծ Հայքի թագավորությանը:

Առաջին իրադարձությունը անհասկանալի է թվում Տիգրան Մեծի մնա՞ն մտտեցնող. մի՞թե նրան պետք չէր Կապաղովկիայի մնա՞ն կարևոր ստրատեգիական դիրք ունեցող հարուստ երկիրը: Հետագա իրադարձությունները, սակայն, թույլ են տալիս

մեզ հասկանալու, որ այստեղ ևս հայոց տիրակալը հեռահար մեծ հաշվարկ ուներ:

Կապադովկիան իր իշխանության տակ վերցնելը կերերը Հռոմի հետ հակամարտության, որն ամենևին պետք չէր այդ ժամանակ Տիգրան Մեծին: Հայկական շահերին լիովին համապատասխանում էր, որ Կապադովկիան անցներ իր դաշնակից Պոնտոսի իշխանության տակ՝ դրանով ապահովելով Մեծ Հայքի թիկունքն արևմուտքից: Փոխարենը Տիգրան Մեծը նախապատրաստվում էր Պարթևստանի դեմ մեծ պատերազմի, որից առաջ պետք էր պետությունն ապահովել տնտեսական և մարդկային ռեսուրսներով: Այդ իսկ պատճառով կապադովկիական արշավանքներից նա Հայաստան բերեց հսկայական հարստություն և մեծ թվով բնակչություն, որի զգալի մասը հետագայում բնակեցվեց նորահաստատ Տիգրանակերտ մայրաքաղաքում:

ՊԱՏՄԱԿԱՆ ՏԵՂԵԿԱՆՔ

(Տիգրանը) Կապադովկիան պաշարելով, մոտ 30 բյուր մարդ տեղահանեց ու տեղափոխեց Չայաստան և նրանց, այլոց հետ միասին, համարնակեցրեց մի վայրում, որտեղ նա առաջին անգամ հազավ Չայաստանի բազը և այդ վայրն իր անունով կոչեց Տիգրանակերտ կամ Տիգրանակոլիս:

*ԱՊՊԻԱՆՈՍ ԱԼԵՔՍԱՆԴՐՈՒՍԻ,
հույն պատմիչ (II դար)*

Փաստորեն, Տիգրան Մեծը կառավարման առաջին փուլում (Ք.ա. 95-91 թթ.) ոչ միայն վերականգնեց Մեծ Հայքի տարածքային ամբողջականությունը, այլև տնտեսական և մարդկային ռեսուրսներով ապահովեց իր ապագա արշավանքները: Նրա կնքած հայ-պոնտական դաշնագրով ապահովագրվեց Մեծ Հայքի թիկունքն արևմուտքից և հյուսիսից:

ՊԱՐԹԵՎԱԿԱՆ ՄԵԾ ԱՐՇԱՎԱՆՔԻ ՄԵԿԵԱՐԿԸ ԳԻՍԱՍՏՂԻ ԽՈՐՀՈՒԲԸ

Ք.ա. 87 թ. մահացավ Պարթևստանի արքա Միհրդատ II Մեծը, որին ժամանակին Տիգրան II-ը կնության էր տվել իր դուստր Արիազատա-Աուտոմային, ինչի համար էլ նա ձեռնպահ էր մնում Պարթևստանի դեմ չուրջ գործողությունների դիմելուց: Միհրդատ II-ի կյանքի վերջին տարիներին սկսված ներքաղաքական պայքարի հետևանքով Պարթևստանը զգալիորեն բուլացել էր: Գահի հիմնական հավակնորդը «աստրապների աստրապ» Գոդարձն էր, որը դեռևս Ք.ա. 91 թ. իրեն բազավոր էր հռչակել Բաբելոնում և փորձել գրավել պարթևական գահը: Պահը հասումացել էր, և հենց Ք.ա. 87 թ. Տիգրան Մեծն անհապաղ հարձակվեց Պարթևստանի վրա:



Նկար 8. Տիգրան II Մեծի դրամներից. առաջինի վրա բազին պատկերված են ավանդական ուրարև աստղն ու երկու արծիվները, երկրորդին՝ գիսավոր աստղը

Ք.ա. 87թ. օգոստոսին Հայաստանի երկնակամարում երևաց գիսավոր աստղ, որն այսօրվա գիտության մեջ ընդունված է կոչել «Հալեյի գիսաստղ»: Տարածված պատկեր-



րացման համաձայն՝ գիսաստղերի երևալը մեծ փոփոխություններ է առաջ բերում երկրի վրա: Բացառիկ այս իրադարձությունը հայ իրականության մեջ ընկալվեց որպես հայոց տիրակալի հաջողության երկնային նախանշան, քանի որ հենց այդ տարի մեկնարկած պարթևական արշավանքով հիմք դրվեց Տիգրանյան աշխարհակալությանը:

Մեզ են հասել մի քանի տասնյակ դրամներ, որոնց վրա արքայի թագին ավանդական ութաթև աստղի և երկու արծիվների փոխարեն տեղ է գտել գիսավոր աստղը...

ՏԻԳՐԱՆՅԱՆ ԱՆԽԱՐՀԱԿԱԿԱԼՈՒԹՅԱՆ ԱՏԵՂԾՈՒՄԸ

Տիգրան Մեծն անհավաղ անցավ գործողության: Դատելով Սարաթոնի վերոհիշյալ տեղեկությունից՝ նա հարվածեց նախ Ատրպատականին և Կորդոքին, որոնց արբանք Միհրդատն ու Ջարքիենոսն ընդունեցին Հայոց արքայի տիրապետությունը և մնացին իրենց գահերին: Ատրպատականի արքա Միհրդատը կնության առնելով Տիգրան II-ի դուստրերից մեկին՝ դարձավ նրա անդամվաճան դաշնակիցը:



Նկար 9. Աղյաբանա ամրոցի ավերակն այսօր



Նկար 10. Հատված մայրաքաղաք Էքրատանի ավերակներից

Այնուհետև շեշտակի հարված հասցվեց Միջագետքին, որ կենտրոնացած էին Գողարձի հիմնական ուժերը, որոնց ջախջախումով նվաճվեց «մնացյալ Միջագետքը»:

(Գիտության մեջ առավել տարածված է կարծիքը, թե «Յոթանասուն հովիտները» Տիգրան II-ը վերադարձրել է այս արշավանքի սկզբին, մինչդեռ, ինչպես նշեցինք վերը, ավելի հավանական է, որ դա տեղի է ունեցել մինչև Ք.ա. 92 թ.):

Ատրպատականին և Միջագետքին տիրելուց հետո հայոց զորքի գլխավոր հարվածն ուղղվեց դեպի Մարաստան, որ գտնվում էր Պարթևստանի ամառային մայրաքաղաք Էքրատանը: Էքրատանի ճանապարհին Տիգրան Մեծը պաշարեց, գրավեց ու հրկիզեց Աղյաբանա ամրոցը, որտեղ պահվում էին պարթև Արշակունիների գանձերը

Երբ հայոց զորքը մոտեցավ Էքրատանին, խուճապահար պարթևական արքունիքը Տիգրան Մեծից խնդրեց հաշտություն: Դրանով պարթևները հայոց արքային էին զիջում ոչ միայն նվաճված տարածքները, այլև «արքայից արքա» տիտղոսը դրանով ընդունելով նրա գերիշխանությունը

ՊԱՏԱԿԱՆ ՎԱԿԵՐԱԳԻՐ

Երբ Տիգրանը նոր միայն սկսում էր, նրա ծրագրերն ու հնարավորությունները խիստ համեստ էին, իսկ այժմ նա հպատակեցրել է բազում ժողովուրդների, խորտակել է, ինչպես դեռևս չէր հաջողվել ուրիշ մեկին, պարթևների հզորությունը, իսկ Միջագետքը հեղեղել է հելլեններով, որոնց նա ամբողջ բազմություններով բռնազաղթեցրել էր Կիլիկիայից ու Կապադովկիայից:

Այլ ժողովուրդներից նա արաբական բռնիքով ցրեցրին քչեց իրենց նախկին վայրերից և բնակեցրեց իր մայրաքաղաքի մոտ, որպեսզի նրանց օգտագործի առևտրական կարիքների համար: Նրա մոտ շատ թագավորներ կային սպասավորի դրությամբ, իսկ նրանցից չորսին նա մշտապես պահում էր իր մոտ, որպես ուղեկից կամ թիկնապահ. երբ նա գնում էր ծով, նրանք, կարճ խիտոններ հագած, վազում էին նրա կողքից, իսկ երբ նստած էր լինում և զբաղվում պաշտոնական գործերով, նրանք կանգնում էին նրա շուրջը, ձեռքները կրծքներին...

ՊՈՒՏՍՐՔՈՍ,
հռոմեացի պատմիչ (I-II դարեր)

Որ Պարթևստանն ընդունել է Տիգրան Մեծի գերիշխանությունն ու մտել նրա աշխարհակալության մեջ, պարզորոշ երևում է հռոմեացի պատմիչ Պոմպեոս Տրոգոսի (Ք.ա. I - I դդ.) հաղորդումից, որտեղ Տիգրան Մեծը հիշատակվում է Պարթևստանի արքաների ցանկում Միհրդատ II-ից հետո: Այսինքն՝ Տիգրան Մեծն այս պատերազմի արդյունքում հայտարարվել է նաև Պարթևստանի արքա:

Պոմպեոս Տրոգոսի տեղեկության մեջ կա կարևոր հավելում այն մասին, որ Տիգրան Մեծին «կոչում էին Աստված»: Որ Հայոց տիրակալն աստվածացվել է կենդանության օրոք, հայտնի է նրա այն դրամներից, որոնց վրա մակագրված է՝ «Տիգրանի՝ արքայից արքայի, Աստծո»...

Այդ պատերազմի արդյունքում նրա գերիշխանությունն ընդունեցին կամ դաշնակից հայտարարվեցին Միջին Ասիայի սկյութական սակարատուկների ցեղերը (Անտաթրիայի հովտում), որոնք պատերազմի ժամանակ զորք էին տրամադրում Հայոց տիրակալին:

Փաստորեն, Ք.ա. 87-86 թթ. մղած պարթևական մեծ պատերազմով Տիգրան Մեծը ստեղծեց իր աշխարհակալությունը: Այդ պատերազմի արդյունքում և դրանից հետո՝ մինչև Ք.ա. 84 թ., Պարթևստանից բացի Հայոց տերությանն են միանում նաև Կորդոքը, Միգդոնիան, Օսրոնենն: Հայկական աշխարհակալության մեջ կամովին ընդգրկվեց նաև Կոմմագենի հայոց թագավորությունը, որտեղ իշխում էր Հայկազուն-Երվանդականների մի ճյուղը:




Նկար 11. Իտալացի նկարիչ Զ. Բուզարդի «Տիգրան Մեծը շրջապատված իրեն ուղեկցող չորս թագավորներով» նկարը (Ամենտիցի, Սուրբ Ղազար, 1885 թ.)

ԿՈՄՄԵԳԵՆԵ-ԿԱՄԱԽԻ ՀԱՅՈՑ ԹՎԳՎՈՐՈՒԹՅՈՒՆԸ

Կոմմագենե-Կամախը երկրամաս է Հայկական լեռնաշխարհի հարավ-արևմուտքում: Այն զբաղեցնում է Հայկական կամ Արևելյան Տավրոսի՝ Եփրատից արևմուտք տարածվող հատվածն իր ստորոտով: Կոմմագենե երկրի բարձրագույն գագաթը Նեմրոսն է (չվիրել Վանա լճի արևմուտքում գտնվող Նեմրոսի հետ), որի գագաթին Անտիոքոս I Երվանդունին (Ք.ա. 70-34 թթ.) կառուցել է թագավորության գլխավոր սրբավայրը:

Երկիրն առավելապես հայտնի է Կոմմագենե անվամբ, որը երկրի հունարեն անվանումն է: Հնագույն ասորեստանյան, խեթական, լուվիական և հայկական աղբյուրներում այն հայտնի է Կամախ, Կումախա, Կումուխ տարբերակներով:



Նկար 12. Կոմմագենեի մեծ սրբավայրը Նեմրոս լեռան վրա (արևելյան հարթակը)



Նկար 13. Անտիոքոս I Երվանդունին՝ Տիգրանյան թագավորի և Կահագն-Արտագենես աստծո հետ (Եփրատի Արամնա)

Մինչև Ք.ա. 201 թ. Կոմմագենե-Կամախը Հայկազուն-Երվանդունիների թագավորության մի մասն էր. այդ են վկայում Նեմրոսի սրբավայրի արձանագրությունները, որոնք որպես Անտիոքոս I-ի հայրական գծով մախնիների իշխատակուն են Երվանդ II-ին (Ք.ա. V-IV դդ.), Երվանդ III-ին (որը Գավգամելայի ճակատամարտից հետո անկախացրեց Մեծ Հայքը), Ք.ա. III դարում իշխած Շամին և Արշամին...

Կոմմագենե-Կամախը Սելևկյան տերությունից անկախացավ Ք.ա. 163 թ. Արշամ արքայի թոռ Պտղոմայոս զորավարի զիափորությամբ: Ք.ա. 80-ական թթ. Կոմմագենեի արքա Միրդատ Կալլինիկոսը (Հաղթանակողը) կամուփն ընդունեց Տիգրանի գերիշխանությունը: Նրա որդի Անտիոքոս I-ը

Ք.ա. 70 թ. գահ բարձրացավ՝ թագադրվելով գիտության մեջ «Տիգրանյան» կամ «Հայկական» կոչվող թագով:

Մինչև թագավորության անկումը՝ Քրիստոսի ծննդյան 72 թ., Կոմմագենե-Կամախի արքաներն իրենց դրամների վրա պատկերում էին «Տիգրանյան» թագը՝ դրանով յուրօրինակ կերպով շեշտելով թագավորության հայկականությունը:



Նկար 14. «Տիգրանյան» կամ «Հայկական» թագը Մարկոս Անտոնիոսի, Օգոստոս Օկտավիանոսի և Կոմմագենի վերջին դրամների վրա

«Տիգրանյան» կամ «Հայկական» թագը հանդես է գալիս նաև հռոմեական դրամների վրա՝ որպես հայոց թագավորության խորհրդանշան: Այդպիսի դրամներ բողարկեցին Մարկոս Անտոնիոսը Ք.ա. 34 թվականին, իսկ ավելի ուշ՝ Օգոստոս Օկտավիանոսը...

ՏԻԳՐԱՆՅԱՆ ԿԱՄ ՀԱՅԿԱԿԱՆ ԹԱԳԻ ԾԱԳՈՒՄԸ

«Տիգրանյան» կամ «Հայկական» թագի ծագումնաբանությանն անդրադարձել են թագմաբանական ուսումնասիրողներ: Առավել տարածված կարծիքն այն է, որ թագի ծագումը կապվում է Արեմենյան աշխարհակալության հետ՝ շեշտադրելու համար Առաջավոր Ասիայում այդ տերության ժառանգորդ լինելը: Սակայն պետք չէ մոռանալ, որ Արեմենյան տերությունն ինքը թագմաբանական հարցերում ժառանգորդն էր համահայկական Վանի թագավորության (Նաիրի-Բիայնի-Արարատ-Ուրարտուի): Ուստի, տրամաբանորեն, «Տիգրան-

յան» կամ «Հայկական» թագի ակունքները ևս հարկավոր է փնտրել Վանի թագավորությունում:



Նկար 15. Վանի թագավորության ժամանակաշրջանում «Հայկական» կամ «Տիգրանյան» թագի նախօրինակներից (թագից վեր աստղը կամ շրջանակը աստվածայնության ցուցիչ էր)

ել իսկապես. Վանի տերության հնավայրերից հայտնաբերված հուշարձաններում գտնում ենք թագի թագմաբանական պատկերներ, որոնք ակնհայտորեն «Տիգրանյան» կամ «Հայկական» թագի նախօրինակներն են: Ավելին, նույն հուշարձաններում թագմաբանական հանդիպում ենք նաև ուրարտական աստղի՝ աստվածային և արքայական իշխանության խորհրդանշանի պատկերմանը, որը տեղ է գտնում Տիգրան Մեծի թագի կենտրոնում, երկու արժիվների միջև:

Փաստորեն, այստեղ տեսնում ենք մեծ տիրակալի հավասարությունը հայրենի ավանդույթների: Դարեր առաջ բարձրացած համահայկական գերտերության խորհրդանշանները որդեգրելով՝ նա դրանք կրկին բարձրացրեց աշխարհակալության աստիճանի...

ՏԻԳՐԱՆ ՄԵԾԸ՝ ՍԵԼԵՎԿՅԱՆ ԳԱՀԻՆ

Տիգրանյան տերությունը սահմանակցում էր Սելևկյան պետությանը, որի հիմնական մասը կազմում էր Ասորիքը: Խնդրո առարկա է դառնում վերջինիս նկատմամբ վերաբերմունքի խնդիրը, որն արդեն երկար ժամանակ բզկտվում էր

երկպառակտչական պատերազմներից և չափազանց բուլլացել էր: Սելևկյան ավագանին ի վերջո որոշեց երկիրը փրկել՝ որևէ օտար տիրակալ հրավիրելով: Քննարկվեցին բազմաթիվ թեկնածություններ և, ի վերջո, ընտրությունը կանգ առավ Հայոց տիրակալի վրա:

ՊԱՏՄԱԿԱՆ ՏԵՂԵԿԱՆՔ

Եղբայրների փոխադարձ ատելությունը, ապա և նրանց որդիներին ժառանգաբար անցած թշնամությունը, անընդհատ պատերազմներ ծնեցին, որոնք ծայրահեղ թուլության հասցրին Ստրիբը ու նրա թագավորներին: Ի վերջո ժողովուրդը դիմեց օտարի օգնությանը և սկսեց փնտրել օտարերկրացի թագավոր: Ոմանք կարծուս էին, որ պետք է հրավիրել Միհրդատ Պոնտացուն, մյուսները՝ Եգիպտոսի Պտղոմեոսին...

Բոլորը համաձայնության եկան Հայաստանի թագավոր Տիգրանի շուրջը, որը սեփական ռազմական ուժ ունենալուց բացի, պարթևների թագավորության դաժակիցն էր ու Միհրդատի խնամին:

Եվ այսպես՝ հրավիրված լինելով Ստրիբի գահին բազմելու, նա 17 տարի շարունակ կռավարում էր անենայն անդորրությամբ, չէր խանգարում պատերազմներով ուրիշների հանգիստը, և ոչ ոք նրան չէր անհանգստացնում, այնպես որ պատերազմելու անհրաժեշտություն չկար:

*ՊՈՍՊԵՆՍ ՏՐՈՂՈՍ,
հռոմեացի պատմիչ (Ք.ա. I-I դարեր)*

Ք.ա. 83 թ. Տիգրան Մեծն Անտիոքում բազմեց Սելևկյանների գահին և տիրեց 17 տարի շարունակ: Ուսումնասիրողներից Թ. Ռեյնաքի գնահատմամբ՝ «Միլիան ազատ շունչ քաշեց, և թեպետ ենթարկվեց նվաստացուցիչ օտար իշ-

խանության, սակայն... ունեցավ խաղաղություն, ապահովություն ու բարեկեցություն»:

Թե ինչ կարևոր դերակատարում ունեցավ Հայոց տիրակալի իշխանությունը Սելևկյան պետության համար, ակնհայտ է թեկուզև մեկ փաստից. Ք.ա. 163-83 թթ. ընթացքում Սելևկյան գահին իշխել էին 19 գահակալներ, որոնցից ոչ մեկը չէր մահացել բնական մահով...

Սելևկյան պետությանը տիրելուց հետո հայոց աշխարհակալության սահմանները հասան Եգիպտոսին: Տիգրանյան տերության մեջ ընդգրկվեց նաև Կիլիկիան, որը մինչ այդ ենթարկվում էր Սելևկյաններին:

ՊԱՏՄԱԿԱՆ ՏԵՂԵԿԱՆՔ

Տիգրանը տիրեց Միհրային՝ (ուպատակեցնելով) Եգիպտոսից այն կողմ գտնվող բնակվող բոլոր սիրիական գեղերին՝ մինչև Եգիպտոս: Միաժամանակ նվաճեց Կիլիկիան, քանզի այն ևս հպատակվում էր Սելևկյաններին և այդ բոլորի վրա ստրատեգոս Նշանակելով Բագադատեսին (իշխեց) 14 տարի:

*ՍՊՊԻՍՆՈՍ ԱԼԵՔՍԱՆՂՐԻՍՏԻ,
հույն պատմիչ (II դար)*

Սելևկյան գահին Տիգրան Մեծի տիրապետության ժամկետի տարբերությունն ըստ Պոմպեոս Տրոգոսի և Ապպիանոսի (17 և 14 տարի) լիովին բացատրելի է: Առաջինը նկատի ունի իրավական իշխանությունը մինչև Ք.ա. 66 թ. Արտաշատի պայմանագիրը, իսկ երկրորդը՝ փաստացին, քանի որ հայկական զորքը դուրս էր քերվել Սելևկիայից Ք.ա. 69 թ. հռոմեա-հայկական պատերազմի ժամանակ:

Միջերկրական ծովի արևելյան ափի երկրների համար կայունությունից ու խաղաղությունից բացի, Տիգրանյան տերության մեջ ներառումը հնարավորություն էր տալիս անսահ-



մանափակ կերպով օգտվելու ցամաքային առևտրի համաշխարհային մարտուղուց: Այն կապում էր Չինաստանն ու Հնդկաստանը Միջերկրական ծովի ավազանին և պատմության մեջ հայտնի է «Մետաքսի մեծ ճանապարհ» անունով: Վերջինս լիովին գտնվում էր Տիգրան Մեծի վերահսկողության ներքո:

ԿԻԼԻԿԻԱՆ՝

ՏԻԳՐԱՆՅԱՆ ՏԵՐՈՒԹՅԱՆ ԿԸԶՄՈՒՄ

Կիլիկիան, որտեղ միջնադարում կրաթճրանա հայկական անգուգական մի պետականություն, բուն Հայաստանի հետ արդեն ունեցել էր սերտ շփումներ: Դեռևս Ք.ա. XXVIII-XXVI դարերում այնտեղ էր հասել Հայաստանի վաղ բրոնզի դարի մշակույթի ազդեցությունը, Կիլիկիան որոշ ժամանակ մասն էր կազմել հարավ-հայաստանյան Միտաննի թագավորության (Ք.ա. XVI-XIII դարեր)...

Սելևկյան պետությանը տիրելուց հետո, ինչպես նշվեց, Կիլիկիան Տիգրանյան աշխարհակալության մասը կազմեց: Այդ ժամանակաշրջանում Կիլիկիան առավելապես հայտնի էր իր ծովահեններով, որոնք ստիպված եղան հաշվի նստել Տիգրան Մեծի հետ: Իր հերթին Հայոց տիրակալը շահագրգռված էր միջերկրածովյան ավազանում գործող ծովահեններին իր ազդեցության ոլորտ ներգրավելով: Մինչև Ք.ա. 83 թ. հայկական տիրապետությունը չէր հասել Միջերկրական ծովի ափերին, և Տիգրան Մեծն այնտեղ նավատորմ չուներ: Կայացավ փոխշահավետ մի համառայնություն, որը հույն մատենագիր Ստրաբոնը բնորոշում է այսպես. «Հայերը ծովը հանձնեցին կիլիկեցիներին»:

Ժամանակին նույն կերպ են վարվել Աբեմենյանները՝ փյունիկացիներին «հանձնելով» Միջերկրական ծովը (իմա՝ դարձնելով իրենց լիազորը ծովում):



Կիլիկյան ծովահենները գործունեության ազատություն ստացան Միջերկրական ծովում՝ վայելելով Տիգրան Մեծի հովանավորությունը, պարտավորվելով իրականացնել նրա շահերից բխող քաղաքականություն (այդ թվում՝ հակահռոմեական): Կա այդ մասին վկայող ուշագրավ մի փաստ:

Ք.ա. 73 թ. Հռոմը Սելևկյան արքա Անտիոքոս Եվսեբեսի որդիներին ճանաչեց «Սիրիայի արքաներ»՝ նրանց տալով «Քարեկամի և դաշնակցի» կարգավիճակ: Նրանք ուղարկվեցին Սիրիա՝ Սելենե-Կլեոպատրա թագուհու հետ իրականացնելու Տիգրան Մեծի դեմ ուղղված հռոմեական քաղաքականությունը: Հատկանշական է, որ երբ արքայազն Անտիոքոսը Միջիլիայի վրայով հասավ Սիրակուզա, լուր ստացվեց Սիրիայից, որ այնտեղից իրենց դեմ են գալիս ծովահենները: Սարսափած արքայազնը փոխեց ճանապարհը և Սիրիա հասավ միայն Ք.ա. 72 թվին...

Փաստորեն, ի դեմս կիլիկյան ծովահենների Տիգրան Մեծը Միջերկրական ծովում ուներ ռազմածովային ուժեր՝ ընդդեմ հռոմեացիների:



Նկար 16. Կողկոսի ծովային ամրոցը Կիլիկիայում

ԱԶԱՏՈՒԹՅՈՒՆ ԱՏԱՅԱԾ ՔԱՂԱՔՆԵՐԻ ՈՒ ԵՐԿՐՆԵՐԻ ԵՐԱՆՏԱԳԻՏՈՒԹՅՈՒՆԸ

Տիրելով Միջերկրական ծովի արևելյան ափի քաղաքներին՝ դրանցից մի քանիսին Տիգրան Մեծը շնորհեց «ազատություններ»։ «Ազատությունները» մերօրյա հասկացությամբ կարելի է ընկալել որպես լայն ինքնավարության իրավունք։ Այդ քաղաքներից էին Լաոդիկեն, Բերիքը (ներկայիս Լիբանանի մայրաքաղաք Բեյրութը), Արադոսը, Տրիպոլիսը, Ալպամեան և այլք, որոնք գրկված էին մնալ իրավունքներից Սելևկյանների իշխանության ներքո։

«Ազատություններ» ստացած քաղաքներից Լաոդիկեն և Բերիքը, ի նշան երախտագիտության, իրենց նոր քաղաքային տոմարը Ք.ա. 81 թ. սկսեցին հաշվել Տիգրան Մեծի շնորհումից սկսած և իրենց քաղաքային դրամների վրա թվականները նշում էին նոր տոմարով։ **Հայոց տիրակալն իր նվաճումներում անգամ ազատարար էր։**

Նման իրադրություն ստեղծվեց պարթևական մեծ արշավանքից հետո. սեփական դրամներ հատեցին Քարակենեի, Էլյումայիսի և Պարսի թագավորությունները, որոնք նախկինում Պարթևտանի տիրապետության տակ էին գտնվում՝ գործել մնալ իրավունքից։ Սեփական դրամահատությունը ենթադրում է մաս որոշակի իրավունքներ ու արտոնություններ, ինչը ևս չմնաց առանց գնահատման։ Մատենագիրների հաղորդման համաձայն՝ Տիգրանակերտի ճակատամարտի նախօրյակին Տիգրան Մեծի կոչով նրան օգնության էին շտապել «Բարեկոյնյա ծովի» (Պարսից ծոցի) ափերին բնակվող Քարակենեի արարական թագավորության զորագնդերը...


ԱԶԱԿՅՈՒԹՅՈՒՆ ԵԳԻՊՏՈՍԻՆ

Ք.ա. 88 թվականին հռոմեացիների դավերի հետևանքով Եգիպտոսից փոխարանվում և Միհրդատ Պոնտացու մոտ ապաստան է գտնում եգիպտական արքայազն Պտղոմեոսը։ Միհրդատ Եվպատորը, սակայն, ի վիճակի չեղավ իր ազդեցությունը հասցնել մինչև Եգիպտոս, ուստի եգիպտական արքայազնի միակ հույսը մնաց Միհրդատ Եվպատորի դաշնակից Տիգրան Մեծը, որը Ք.ա. 83 թվականից արևելամիջերկրական ավազանում ամենաազդեցիկ ուժի կրողն էր։

Ք.ա. 80 թ. հռոմեացիները Եգիպտոսում գահ բարձրացրեցին Պտղոմեոս XI-ին, որը նախապես Պտղոմյան թագավորությունը (Եգիպտոսն ու Կիպրոսը) կտակել էր Հռոմին։ Նրա գահակալման 19-րդ օրը եգիպտացիներն ապստամբեցին դավաճան գահակալի դեմ, ինչի արդյունքում իշխանության եկավ Ք.ա. 88 թ. փոսրանված արքայազն Պտղոմեոսը՝ դուրս մղելով հռոմեական ուժերին։

Տիգրոնի հաղորդման համաձայն՝ մինչ այդ արքայազն Պտղոմեոսը գտնվում էր Սիրիայում, այսինքն՝ Տիգրան Մեծի մոտ։ Նա Տիգրան Մեծի տրամադրած օգնական զորով Սիրիայից մտավ Եգիպտոս և հռչակվեց Պտղոմեոս XII Ավլետոսը (Սրնգահարը)։ Փաստորեն, Հայոց տիրակալի շնորհիվ Եգիպտոսը փրկվեց հռոմեական նվաճումից։

Եգիպտոսը, բնականաբար, դարձավ հայաձեռն քաղաքականության կրող։ Դժվար է ասել, թե ինչ ծրագրեր է ունեցել Տիգրան Մեծը՝ կապված Եգիպտոսի հետ։ Սակայն ճակատագիրը շատ դաժան ու անարդար դուրս եկավ Հայոց գահի նկատմամբ։ Պտղոմեոս XII-ն Եգիպտոսի ապագա հանրահայտ թագուհի Կլեոպատրա VII-ի հայրն էր։ Հայոց տիրակալը փրկեց Պտղոմեոսին, մինչդեռ նրա դուստր Կլեոպատրան մահապատժի ենթարկեց Տիգրան Մեծի որդուն՝ Արտավազդ II-ին...



Նկար 17. Տեսարան Եգիպտոսից

ՆԱԲԱԹԵՆ՝ ՏԻԳՐԱՆՅԱՆ ՏԵՐՈՒԹՅԱՆ ԿԱԶՄՈՒՄ

Մեկնականներին տիրելուց հետո, Ապպիանոսի հաղորդման համաձայն, հայկական աշխարհակալության սահմանը տարածվեց «Եփրատից այն կողմ... մինչև Եգիպտոս»: Դա Ք.ա. 83 թվականին էր:

Մինչ այդ Կոլյե-Սիրիայի (Խորազուն Ասորիք, որի կենտրոնը Դամասկոսն էր) և Փյունիկիայի համար պայքարում էր Նարաբեայի արքա Արեթաս (Հարիթաթ) III-ը (Ք.ա. 87-62 թթ.): Հովսեփոս Փլավիոսի մի տեղեկությունից պարզ է դառնում, որ Փյունիկիան և Կոլյե-Սիրիան գրավվել են նախ նարաբեացիների, ապա Տիգրան Մեծի կողմից: Հայոց տիրակալի իշխանությունը ճանաչեցին և փյունիկյան քաղաքները, և Կոլյե-Սիրիայի արքա Պտղոմեոս Մեննայոսը (Ք.ա. 85-40 թթ.):

Կոլյե-Սիրիայից մինչև Եգիպտոս տարածվում էր Նարաբեան, որից էլ խլվել էին Փյունիկիան և Կոլյե-Սիրիան: Դա նշանակում է, որ պարտված նարաբեացիները ոչ միայն

կորցրել էին նշված տարածքները, այլև պարտվելով՝ իրենք և ճանաչել էին հայերի գերիշխանությունը:

Փյունիկիայի և Կոլյե-Սիրիայի քաղաքներն արագորեն սկսեցին կարևոր դերակատարում ունենալ հայկական աշխարհակալության մեջ: Փյունիկյան քաղաքների մասին արդեն խոսվեց, իսկ Կոլյե-Սիրիայի մայրաքաղաք Դամասկոսում Ք.ա. 72-69 թթ. գործում էր Տիգրան Մեծի շորորոդ գլխավոր դրամահատարանը (առաջին երեքը գտնվում էին Արտաշատում, Անտիոքում և Տիգրանակերտում):

ՀՌՈՄԻ ԽԱՐԳՎԱԿԱՆՔՆԵՐԸ ԵՎ ՀՐԵԱՍՏԱՆԻ ԱՆՉՆԱՏՎՈՒԹՅՈՒՆԸ

Ք.ա. 83-73 թթ. Միջերկրականի արևելյան ափի համար եղավ խաղաղության և շենության տասնամյակ: Ք.ա. 73 թ. այդ խաղաղությունը խախտվեց՝ Հռոմի հրահրմամբ:



Նկար 18. Տեսարան Նարաբեայի մայրաքաղաք Պետրայից



Այդ բովանակման եռանդուն կերպով սկսեց գործել հռոմեական դրածո Սելենե-Կլեոպատրան, որի կերպարին արժե անդրադառնալ երկու խոսքով: Նա եգիպտական արքայադուստր էր, որն ամուսնացավ Սելևկյան Անտիոքոս VIII արքայի հետ: Նրա ամուսինը սպանվեց հարազատ եղբոր կողմից, որը գրավեց գահը: Սելենե-Կլեոպատրան ամուսնացավ իր ամուսնուն սպանող եղբոր հետ: Սելենե-Կլեոպատրայի ավագ որդին սպանեց մոր հետ ամուսնացած իր հորեղբորը... Մակայն դրանից հետո Սելենե-Կլեոպատրան ամուսնացավ երրորդ անգամ, այս անգամ սպանված երկրորդ ամուսնու ավագ որդու հետ, որը ծնվել էր մեկ այլ կնոջից...

Սելենե-Կլեոպատրան խոռվություն բարձրացրեց փյունիկյան Պտղոմայիս քաղաքում, որի հետ միաժամանակ Հռոմի դղմամբ Տիգրան Մեծի դեմ ռազմական գործողություններ սկսեցին Նաբաթեայի և Հրեաստանի (Հուդայի) թագավորությունները:

Դրանով Հռոմը փորձում էր և՛ իր խախտված դիրքերը վերականգնել Միջերկրականի արևելքում, և՛ կաշկանդել Տիգրան Մեծին, որպեսզի նա չկարողանա աջակցել Միդիդատ Եվպատորին Ք.ա. 74 թ. սկսած Միդիդատյան երրորդ պատերազմում:

Դատելով եղած հաղորդումներից՝ հայոց զորքը Կոլոն-Սիրիայի արքա Պտղոմեոս Մենմալոսի աջակցությամբ թույլ չի տվել, որ միավորվեն նաբաթեացիների և հրեական բանակները, և Դամասկոսի մատույցներում ջախջախել է նաբաթեացիներին: Բարդ վիճակում հայտնված հրեական բանակը, որի առաջնորդը արքայազն Արիստոբոլոսն էր, ստիպված էր վերադառնալ «գործելով նշանակալից որևէ բան» (Հովսեփոս Փլավիոսի բնորոշմամբ):

Հռոմեամետ հարավային դաշինքը Տիգրան Մեծի դեմ ձախողվեց: Նաբաթեան պարտվեց, իսկ Սելենե-Կլեոպատրան պաշարվեց Պտղոմայիսում և որոշ ժամանակ անց գերվելով՝ մահապատժի ենթարկվեց: Հրեաստանի թագուհին լավ գիտակցում էր իր քաղաքական մեծ սխալը: Ուստի երբ Տիգրան Մեծը գտնվում էր դեռևս Փյունիկիայում, նախապես



նա ուղարկեց իր դեսպաններին՝ հայտնելու Հրեաստանի կողմից հայոց տիրակալի գերիշխանության ճանաչումը:

ՊԱՏԱԿԱՆ ՏԵՂԵԿԱԼՔ

Այդ ժամանակ էլ լուր է հասնում, թե Չայոց թագավոր Տիգրանը երեսուն բյուր զորքով ներխուժել է Սիրիա և գալիս է Հրեաստանի դեմ: Սա, բնականաբար, ահաբեկեց թագուհուն և ժողովրդին: Ուստի նրանք բազում և արժանավայել ընծաներ ուղարկեցին նրան և դեսպաններ, երբ նա դեռևս պաշարում էր Պտղոմայիս (քաղաքը), քանի որ Սելենե թագուհին, որը կոչվում էր նաև Կլեոպատրա, այդ ժամանակ տիրում էր Սիրիային և հորդորել էր բնակիչներին դռները փակել Տիգրանի առաջ...


Դեսպանները, հանդիպելով նրան, խնդրում էին բարենպաստ պայմաններ շնորհել թագուհուն և ժողովրդին: Իսկ նա, զնահատելով այն, որ նրանք ժամանել են այդքան հեռու տարածությունից, լավագույնս հուսադրեց...

ՅՈՎԱՆՊՈՍ ՓԼԱՎԻՈՍ,
իրեն պատմիչ (I – II դարեր)

ՏԻԳՐԱՆՅԱՆ ԱՇԽԱՐՀԱԿԱԼՈՒԹՅԱՆ ՍԱՀՄԱՆՆԵՐԸ

Նախորդ էջերում ընդհանուր գծերով ներկայացվեց Տիգրանյան աշխարհակալության ստեղծումը, որը կատարվեց քառորդ դարում՝ Ք.ա. 95–70 թթ. ընթացքում: Այս ժամանակամիջոցում տեղի ունեցան այլ իրադարձություններ ևս, որոնց չանդրադարձամք:

Դրանցից է, օրինակ, Բաբելոնյան աստղաբաշխական սեպագիր մի արձանագրության հաղորդումը, ըստ որի՝ Ք.ա. 82 թ. հայոց զորքերն արշավել են դեպի Տիգրիսի վրա գտնվող



Քարտեզ 4. Հայոց աշխարհակալությունը Տիգրան Մեծի օրոք

Սելևկյա քաղաքը: Թե՛ ինչ կապակցությամբ է եղել արշավանքը, պարզ չէ. հայտնի է, որ այն առաջնորդում էր արքայազն Տիգրանը (Տիգրան Կրտսերը): Չանդրադարձանք նաև հայկական զորքերի կողմից Կապադովկիայի երրորդ անգամ ռազմակայմանը, որի հետևանքով այդ երկիրն ընդգրկվեց Տիգրանյան տերության մեջ (տարբեր ուսմանասիրողներ այդ արշավանքը քվագրում են Ք.ա. 77 կամ 74 թ.):

Անփոփելով Տիգրանյան տերության ստեղծման պատմությունը՝ կարող ենք արձանագրել հետևյալը: Տիգրան Մեծը քառորդ դարում ստեղծեց հզոր մի աշխարհակալություն, որի սահմաններն ու քաղաքական ազդեցության ոլորտները ձգվում էին Եգիպտոսից և Կարմիր ծովից մինչև Կովկասյան լեռներ, Կասպից ծով և Անուղարիայի հովիտ, Սև ծովից ու Փոքր Ասիայի կենտրոնից մինչև Պարսից ծոց և Հնդկական օվկիանոս, Միջերկրական ծովից մինչև Հնդոսի ավազան:

Հայոց տերությունը՝ գերիշխանության ներքո գտնվող երկրներով և քաղաքական ազդեցության ոլորտներով հանդերձ կազմում էր շուրջ 3 մլն. քառակուսի կմ տարածք:



Նկար 19. Սելևկյան մեծ քաղաքներից Ապամեայի ավերակներն այսօր

ՏԻԳՐԱՆ ՄԵԾԻ ԱՆՎԱՐԲ ՆՈՐ ԲՆԱԿԱՎԱՅՐԵՐԻ ՀԻՄՆՈՒՄԸ

Մտեղծված աշխարհակալության մեջ Մեծ Հայքի մայրաքաղաք Արտաշատը հայտնվել էր հյուսիսային ժայռամասում: Տիգրան Մեծի երկրորդ մայրաքաղաքը, սկսած Ք.ա. 83 թվականից, Ամտիոքն էր՝ Սելեկյանների մայրաքաղաքը, որը գտնվում էր հայոց հողից դուրս:

Ք.ա. 80-ական թթ. անհրաժեշտություն առաջացավ աշխարհակալության համար նոր մայրաքաղաք հիմնադրելու: Տիգրան Մեծն, անշուշտ, կարող էր նոր մայրաքաղաք հռչակել նվաճված երկրների մայրաքաղաքներից կամ խոշորագույն քաղաքներից մեկը, սակայն նա չգնաց այդ քայլին, քերևա, համոզված, որ տիրակալի գլխավոր տունը պետք է գտնվի հայրենի հողում: Եվ նա նոր մայրաքաղաք Տիգրանակերտը հիմնեց մի վայրում, որը և՛ հայոց հողում էր, և՛ համեմատաբար կենտրոնական դիրք էր գրավում տերության մեջ:

Դա այն վայրն էր, որտեղ Ք.ա. 95 թ. պատանդությունից վերադառնալով՝ թագադրվել էր արքայազն Տիգրանը: Փաստորեն, դեռևս պատանդության մեջ գտնվելով՝ նա մշակել էր աշխարհակալության հասնելու մի ծրագիր և Հայաստան մտնելուց առաջ արդեն իր ստապատկերում ուներ ապագա աշխարհակալության ուրվագիծը, որի հետագա մայրաքաղաքի տեղում էլ կատարեց իր թագադրությունը:

Ք.ա. 95 թ. առաջին հայացքից թվացյալ կարգի խախտում ընկալվող այդ քայլը բոլորին հասկանալի դարձավ շուրջ երկու տասնամյակ անց: Մեծն Տիգրանը ծրագրեր էր կազմում և իրագործում տասնամյակների հեռավորությամբ:

Եվ կառուցվեց մեծ տերությանը վայել, մեծաշուք և հրաշագեղ մի քաղաք՝ իր ժամանակի աշխարհի մեզապոլիսներից մեկը:

ՊԱՏՄԱԿԱՆ ՏԵՂԵԿԱՆՔ

*Նա քաղաքը շրջապատեց 50 կանգուն բարձրությամբ պարիսպով, որի հաստության մեջ կային ձիերի բազմաթիվ այտուներ: Քաղաքի արվարձանում նա կառուցեց պալատ՝ ընդարձակ զբոսայգիներով, որսատեղերով և լճերով:
Մերձակալքում նա բարձրացրեց նաև հզոր մի բերդ:*

*ԱՊՊԻԱՆՈՍ ԱՆԷՔՍԱՆԴՐԻԱՅԻ,
հույն պատմիչ (II դար)*

Քաղաքը շրջապատված էր 50 կանգուն, այսինքն՝ 25 մետր բարձրությամբ պարիսպով, ուներ անստիկ միջնաբերդ: Տիգրանակերտն Արևելքի նշանավոր քաղաքներից էր, արիստագործության, առևտրի ու մշակույթի խոշոր կենտրոն: Այն ուներ իր թատրոնը:

Կարճ ժամանակամիջոցում կառուցվեց մեծ ու շքեղ մի քաղաք: Ուշագրավ է, թե ինչպիսի նախանձախնդրությամբ են հայերն արագորեն ծաղկեցրել իրենց նոր մայրաքաղաքը. օտար պատմիչի վկայությամբ՝ հայերը դա անում էին «համուն արբայի նկատմամբ տաճած սիրո և հարգանքի»:

ՊԱՏՄԱԿԱՆ ՏԵՂԵԿԱՆՔ

Տիգրանակերտը լի էր զանծերով, շքեղ կառույցներով և աստվածներին նվիրաբերված բանկարժեք ընծաներով, քանզի մասնավոր անձինք և մեծատոհմիկները, հանուն արքայի նկատմամբ տաճած սիրո և հարգանքի, միմյանց հետ մրցում էին քաղաքի շենություն ու ընդարձակման համար:

*ՊԼՈՒՏԱՐԽՈՍ,
հռոմեացի պատմիչ (I – II դարեր)*

Նշենք, որ մինչ օրս շարունակվում են բանավեճերը մայրաքաղաք Տիգրանակերտի գտնվելու վայրի առնչությամբ: Այդ հարցին վերջնական պատասխան կարող են տալ ապագա հնագիտական պեղումները...

Հայոց տիրակալը կառուցեց երկրի համար կենսական նշանակություն ունեցող Արբունի պողոտան, որը կապում էր հին մայրաքաղաք Արտաշատը Տիգրանակերտին:

Տիգրանակերտ մայրաքաղաքից բացի, Մեծն Տիգրանն իր անունով հիմնադրեց ևս մի քանի բնակավայր: Տիգրանակերտ անվամբ քաղաքներ հիմնադրվեցին Հյուսիսային Միջագետքում (ներկայիս Թել-Արմանի հնավայրի տեղում), Ատրիքի հյուսիսում (Ջևզմայի մոտ), Ուտիք և Արցախ նահանգներում, և երկու բնակավայր՝ Տիգրանավան անվամբ՝ Գողթնում ու Մարաստանում:

Ինչպես տեսնում ենք, բոլոր նշանավոր միապետերի նման Տիգրան Մեծը ձգտել է իր անունը հավերժացնել նաև նոր բնակավայրեր հիմնելով:



Նկար 20. Արցախի Տիգրանակերտի պեղված հատվածներից (հայտնաբերվել է 2006 թ.)



Նկար 21. Հռոմի Կոլիզեոնը

ՕԳՆՈՒԹՅՈՒՆ ՍՊԱՐՏԱԿԻՆ

Հռոմի և Մեծ Հայքի միջև անուղղակի հակամարտությունն սկսել էր դեռևս Ք.ա. 93 թ. Կապադովկիայի դեմ կատարված արշավանքով: Այն ավելի ընդգծվեց Ք.ա. 92 թ. հռոմեա-պարթևական դաշինքով, որն ուղղված էր ընդդեմ Մեծ Հայքի ու Պոնտոսի:

Հռոմն ի վիճակի չեղավ պատասխանելու Ք.ա. 80 թ. Եգիպտոսում Տիգրան Մեծի միջամտությանը: Իր հերթին Ք.ա. 73-70 թթ. Հռոմը փորձեց Միջերկրականի արևելյան ծովափին Տիգրան Մեծի դեմ դուրս բերել իր դրամո Սելենե-Կլեոպատրային, Նարաթեայի և Հրեաստանի քազավորություններին: Ինչպես նշվեց, այդ փորձը լիակատար ձախողումնեցավ:

Ուսումնասիրությունները ցույց են տալիս, որ Տիգրան Մեծը ևս ոչ միայն ուշի-ուշով հետևել է Հռոմի տիրապետության սահմաններում կատարվող կարևոր իրադարձություններին, այլև փորձել է միջամտել դրանց:

Ք.ա. 73–71 թթ. Հռոմը ցնցվում էր ստրուկների ամենա-
հուժկու ապստամբությունից, որի գլուխ էր կանգնած Սպար-
տակը: Ք.ա. 71 թ. սկզբին հռոմեացի զորավար Կրաստը
երեք կողմից ծովով, իսկ չորրորդից իր բանակով պաշա-
րելով՝ փորձում էր Իտալիայի հարավում (Քրուտտիական
բերակղզում) սովամահ անել ապստամբներին: Սակայն
Սպարտակը «ինչ-որ տեղից» ստացավ օգնական հեծելա-
գոր, ինչի շնորհիվ ճեղքեց պաշարման օղակը և շարժվեց
ղեպի հյուսիս-արևելք՝ Հունաստան տեղափոխվելու մտա-
դրությամբ: Եթե ապստամբները բարեհաջող հասնեին ծո-
վափ, օգնության եկող նավատորմը Հունաստան պետք է
փոխադրեր ապստամբների շուրջ 60-հազարանոց բանա-
կը: Այդ ծրագիրը խափանվեց, քանի որ ապստամբությու-
նը ճնշվեց Ք.ա. 71 թ. մարտին:

Ո՞վ կարող էր ուղարկել օգնական հեծելագոր, իսկ
հետո՝ նաև հսկայական բանակը ծովով փոխադրելու ըն-
դունակ նավատորմ:

Միջերկրական ծովի ավազանում միայն երկու տիրա-
կալներ էին, որ այդ ժամանակ կարող էին հսկայորվել Հռո-
մին և օգնություն ուղարկել վերջինիս ներքին բշտամուն՝
Միհրդատ Պոնտացին ու Տիգրան Մեծը: Սպարտակի՝ Հու-
նաստան տեղափոխվելու ծրագիրը համապատասխանում
էր հենց նրանց շահերին:

Միհրդատ Եվպատորի թեկնածությունն այս պարագա-
յում բացառվում է, քանի որ նա Ք.ա. 73 թ. վերջին պարտու-
յուն կրելով հռոմեացիներից՝ նահանջել էր, ոչնչացել էր նրա
նավատորմի մեծ մասը: Ք.ա. 72 թ. երկրորդ կեսին Լուկիոս
Լիկինիոս Լուկուլյոսի ղեկավարած հռոմեական բանակները
նրան հետապնդում էին արդեն իր իսկ երկրում՝ Պոնտոսում:

Մնում է միայն մեկ հակառակորդ՝ Տիգրան Մեծը:
Միայն նրա ուղարկած հեծելագորը կարող էր օգնել Սպար-
տակին, և նա կարող էր պատրաստակամություն հայտնել իր
կամ իր դաշնակից կլիվկան ծովահենների նավերով Հու-
նաստան տեղափոխել ապստամբ բանակը: Դա նաև յուր-
օրինակ պատասխան հարված կլիներ Հռոմին՝ Ք.ա. 73-70

թվականներին Միջերկրական ծովի արևելքում կազմակեր-
պած հակահայկական խարդավանքների դիմաց...

Փաստորեն, մենք տեսնում ենք ավելի քան քսանամյա
լուռ, անուղղակի և միջնորդավորված հակասություն Հռոմի և
Հայաստանի միջև, որն, ի վերջո, պետք է պայթեր՝ Ք.ա. 69 թ.
վերածվելով հռոմեա-հայկական բացահայտ պատերազմի:

ԼՈՒԿՈՒԼԼՈՍԸ՝ ՏԻԳՐԱՆ ՄԵԾԻ ՄԱՍԻՆ

Հայաստանի հետ ուղղակի բախումից հետո հռոմեացի
պատմիչները ջանք չխնայեցին երևակայական ու ծիծաղե-
լիության աստիճանի հասնող ստեր հորինելու հայերի և ան-
ձամբ Տիգրան Մեծի մասին: Այդ երևույթին մենք դեռ կանդ-
բաղառնանք: Սակայն կարևոր և ուշագրավ է այն, թե մինչև
բախման մեջ ստնելը հենց իրենք ինչպիսի գնահատական
էին տալիս իրենց ապագա հակառակորդին:


Պլուտարքոսը Լուկուլյոսի կենսագրության մեջ բերում է
չառ հետաքրքիր մի դրվագ: Հռոմեացի զորավարները Լու-
կուլյոսին մեղադրում էին դանդաղկոտության մեջ, քանի որ
նա չէր փորձում միանգամից վերջնական հարված տալ
Միհրդատ Եվպատորին, այլ հապաղելով՝ հնարավորություն
էր ընձեռում ուժեր հավաքելու: Լուկուլյոսն իր քայլն արդա-
բացնում է Տիգրան Մեծի հետ բախվելու հեռանկարից գոու-
շանալով: Մեջբերենք նրա խոսքը՝ արտասանված Ք.ա. 71
թ., որում տրվում է Հայոց տիրակալի գնահատականը.

ՊԻՍՏԱԿԱՆ ՏԵՂԵԿԱՆՔ

«Ինձ էլ այդ է պետք,- հակաճանեց նրանց նա,- ես
դիտավորյալ եմ դանդաղում: Ընդ արքան նորից հզորանա
և կռիվ համար բավականաչափ զորք հավաքի, այնպես, որ
մնա տեղում և մեր մոտենալուց չփախչի:

... Մինչև Հայաստան ընդամենը մի քանի օրվա ճանապարհ է, իսկ Հայաստանում թագավորում է Տիգրանը, արքայից արքան, որն իր գործով փակում է պարթևների ճանապարհը դեպի Փոքր Ասիա, իսկ հունական քաղաքային համայնքները վերաբնակեցնում է Մեդիայում, այդ արքան նվաճել է Ասորիքն ու Պաղեստինը, իսկ Սելևկյան տոհմի թագավորին մահվան մատնել ու գերության տարել նրա կանանց ու դուստրերին: Եվ նման մարդը Միհրդատի բարեկամն է, նրա փեսան: Եվ եթե Միհրդատը դիմի նրա պաշտպանությանը, ապա նա Միհրդատին չի թողնի փորձանքի մեջ և պատերազմ կսկսի մեր դեմ: Չլինի այնպես, որ շտապելով Միհրդատին դուրս բշել իր տիրույթներից, հանդիպենք Տիգրանին ու փորձանքի գանք: Բանզի նա արդեն վաղուց առիթ է փնտրում մեր դեմ պատերազմելու. իսկ նա առավել հարմար ի՛նչ առիթ կարող է գտնել, քան արքայական ազգակցին փորձանքի մեջ օգնելը»:

ՊԼՈՒՏԱՐՔՈՍ,
հռոմեացի պատմիչ (I – II դարեր)



Նկար 22. Հատված Նփրկերոսի ամրոց-ինսպայրից, որը որոշ գիտնականների կարծիքով կարող էր լինել մայրաքաղաք Տիգրանակերտը

ԼՈՒԿՈՒԼԼՈՍԻ ԱՆՆԿՆԿԱԿ ՀԱՐՉԱԿՈՒՄԸ

Ք.ա. 74 թ. սկսած Միհրդատյան երրորդ պատերազմում Միհրդատ Եվպատորը պարտություն կրեց հռոմեական զորքերից: Ք.ա. 71 թ. նա փախուստի դիմեց և ապաստանեց Հայաստանում: Լուկուլլոսը պատվիրակություն ուղարկեց Հայաստան՝ խնդրելով իրեն հանձնել Հռոմի երզնյալ բշնամուն: Մակայն Տիգրան Տիգրես ոչ միայն չհանձնեց իր դաշնակցին ու ազգականին, այլև չէր շտապում վերադառնալ Հայաստան և շարունակում էր ավելի քան մեկ տարի Միջերկրականի արևելքում գրավել իր տերության գործերով: Հավանաբար, պատճառն այն է, որ իր հետախուզության տվյալներից Տիգրան Մեծը տեղյակ էր, որ Հռոմի սենատը չի լիազորել Լուկուլլոսին պատերազմելու իր դեմ:

Լուկուլլոսը ստիպված էր ատամները սեղմած սպասել հարմար մի առիթի: Նա Փոքր Ասիայում կատարեց հարթահանդես Պոնտոսի դեմ տարած հաղթանակի առիթով, սակայն ինքնին հասկանալի էր, որ քրանի դեռ ողջ է Միհրդատ Եվպատորը և պաշտպանված Տիգրան Մեծի կողմից, Հռոմի անվտանգությունը չէր կարող երաշխավորված լինել:

Ք.ա. 69 թ. գարնանը, երբ Տիգրան Մեծը գտնվում էր Փյունիկիայի տարածքում, Լուկուլլոսը ներխուժեց Հայաստան և պաշարեց Տիգրանակերտը: Նրա զորքի թիվը (դաշնակիցների հետ միասին) անցնում էր 45 հազարից:

Դա անսպասելի էր բոլոր առումներով, նաև՝ ռազմավարական: Առանց համապատասխան պատրաստության Հռոմը չէր սկսի պատերազմ Արևելքի հզորագույն հարևանի դեմ: Միակ բացատրությունը կարող է լինել այն, որ Լուկուլլոսն իր հետախույզների միջոցով տեղեկացել էր Հայոց թագուհու Տիգրանակերտ ժամանման մասին և որոշել կայծակնային գրոհով գրավել ահմանին մոտ գտնվող մայրաքաղաքը: Գերված թագուհուն հետ ստանալու՝ իր պատիվը փրկելու



համար Տիգրան Մեծը ստիպված կլիներ հանձնել Միհրդատ Եվաթատրին, մանավանդ, եթե գերված թագուհին լիներ հենց Միհրդատի դուստր Կլեոպատրան: Սակայն Լուկուլոսը շարաշար սխալվեց...

Նկար 23. Լուկուլոս

ՀՋՏՈՒԿ ՆՇԱՆԱԿՈՒԹՅԱՆ ԳՈՐԾՈՂՈՒԹՅՈՒՆԸ

Տիգրան Մեծը երեք հազարանոց առաջապահ հեծյալ մի գունդ ուղարկեց Հայաստան Մերուժան գորավարի գլխավորությամբ, ապա ինքն անձամբ բիկնապահ գնդով շտապեց Հայաստան՝ հրամայելով բանակի հիմնական ուժերին հետևել իրեն:

Երբ Տիգրան Մեծը 6000-անոց թիկնապահ գնդով հասավ Հայաստան, Տիգրանակերտ մայրաքաղաքը պաշարված էր: Այդ թիկնապահ գունդը կատարեց հատուկ նշանակության բացառիկ մի գործողություն: Փոքրաթիվ այս զորագունդը կարողացավ կատարել հերոսական գործողություն՝ ճեղքեց հռոմեական 45 հազարանոց բանակի պաշարումը և մտավ մայրաքաղաք: Շատ ավելի բարդ էր լինելու հետդարձի գործողությունը, որն արքայական թիկնագործ իրականացրեց բացառիկ հերոսականությամբ:

Երկրորդ անգամ ճեղքելով բազմապատիկ հռոմեական բանակի պաշարման շղթան, հայոց քաջերը մայրաքաղաքից անվտանգ դուրս բերեցին թագուհուն, կանանոցը և ողջ արքայական զանձարանը: Լուկուլոսի ծրագիրը խափանվեց:

ՊԱՏՄԱԿԱՆ ՏԵՂԵԿԱՆՔ

Նա (Տիգրանը) նույնպես զորք ուղարկեց Տիգրանակերտ քաղաքը, որի մեջ գտնվում էր նրա կանանոցը: Սրանք գալով այնտեղ և նետածգությամբ կտրելով հռոմեական ճամբարից դուրս գալու ճանապարհը դուրս բերեցին զիշերով նախապես Տիգրանի կանանոցն ու թանկագին անենաարժեքավոր իրերը:

ՄԵՄՆՈՆ,
պոնտացի պատմիչ (II դար)

Տիգրանը հավաքելով մոտ 25 բյուր հետևակ և 5 բյուր հեծյալ, նախ նրանցից մոտ 6000-ին ուղարկեց Տիգրանակերտ, որոնք հռոմեացիների միջով մտնելով բերդ, այնտեղից իվեցին ու դուրս բերեցին թագավորի հարձերին:

ԱՊՊԻԱՆՈՍ ԱԼԵՔՍԱՆԴՐՈՍԻ,
հույն պատմիչ (II դար)

Արքայական թիկնագործի հատուկ նշանակության այս գործողությունն իրավամբ կարող է համարվել ռազմարվեստի համաշխարհային պատմության գեղարձեցից մեկը...

ՏԻԳՐԱՆԱԿԵՐՏԻ ՃԱԿԱՏԱՄԱՐՔԸ

Ք.ա. 69 թ. աշնանը Տիգրան Մեծի հիմնական ուժերը գտնվում էին Տիգրանակերտի մերձակայքում: Օգնական գնդեր էին եկել մաև ենթակա երկրներից:

Ք.ա. 69 թ. հոկտեմբերի 6-ին տեղի ունեցավ Տիգրանակերտի ճակատամարտը, որին մասնակից հայկական բանակի թվի մասին աղբյուրների տեղեկությունները չափազանց տարբերվում են իրարից: Պլուտարքոսն ու Ապպիանոսը ներ-

կայացնում են 300 հազար, իսկ փոքրասիական ծագումով պատմիչները, որոնք առավել չեզոք են, ուստի՝ ավելի վստահելի, հաղորդում են անհամեմատ փոքր թվեր. Մեմնոնը՝ 80 հազար, իսկ Փղեզոնը՝ 70 հազար:



Նկար 24. Իտալացի նկարիչ Ջ. Ֆուգարոյի «Տիգրան II-ի կամանոցի և արքունական զանձների դուրսերումը պաշարված Տիգրանակերտից» նկարը (Վենետիկ, Սուրբ Ղազար, 1885 թ.)

Ամենայն հավանականությամբ, 300 հազարը Տիգրան Մեծի ողջ տերության բանակների թիվն է՝ նվաճյալ երկրների գորբերով համդերծ: Իսկ Տիգրանակերտի ճակատամարտին հայկական կողմից մասնակցել է 70-80 հազար զինվոր: Հռոմեացի պատմիչները Լուկուլլոսի փառքը մեծացնելու համար ներկայացրել են Տիգրանյան ողջ տերության բանակների թիվը, որոնք բոլորը միաժամանակ մեկ տեղում անգամ տեսականդրեն չէին կարող հավաքվել:

Ճակատամարտն ավարտվել է հայկական կողմի անհաջողությամբ: Թե ինչը կարող էր լինել դրա պատճառը, կփորձենք հասկանալ քիչ անց: Այստեղ ապշեցուցիչ է, թե ինչ կեղծիքներ են սկսում հորինել հռոմեացի պատմագիրները Տիգրան Մեծի մասին, երբ նրա գորբերն ուղղակիորեն քախվում են հռոմեացիների հետ:

Ըստ Պլուտարքոսի՝ հայերի հետևակից ավելի քան 100 հազար սպանվել էին, իսկ հեծելազորը (որը բաղկացած էր 55 հազար հեծյալից) գրեթե լիովին ոչնչացել էր, մինչդեռ հռոմեական բանակը տվել է ընդամենը 5 սպանված: Հայերի շուրջ 150 հազարի դիմաց հռոմեացիների 5 զոհ տալուն կարելի էր հավատալ, եթե Ք.ա. I-ին դարում Հռոմն ունենար ինքնաբիրոններ և միջուկային զենք...

Ինքը՝ Պլուտարքոսը, մոռանալով իր իսկ կեղծիքի մասին՝ մեկ այլ աշխատանքում («Փնջույքի գրույցներ») քերում է Տիգրանակերտի ճակատամարտում հայերի տված զոհերի միանգամայն այլ թիվ՝ 10 հազար...

ՀՌՈՍԵԱՅԻ ՊԱՏԱԿՈՒՆԵՐԻ ԿԵՂԾԱՐԱՐՈՒԹՅԱՆ ՆՊԱՏԱԿԸ

Տիգրան Մեծի մասին հորինված նման անտրամաբանական կեղծիքների դեռ կիսանդիպենք: Դրանց առնչությամբ կարելի է պարզապես կրկնել XX դարի մեծագույն պատմաբաններից մեկի՝ Նիկողայոս Ադոնցի սրբափ գնահատականը. «Ներևակայական մանրամասները, ծիծաղաշարժ տեսարանները, որոնցով հարուստ են ստրկամիտ գրողների նկարագրությունները, կոչված են ցուցահանելու հաղթանակած հռոմեացիների իմաստությունն ու ճարակությունը և ցուցադրելու նրանց պարտված հակառակորդների ոչնչությունը: Իրականությունը, սակայն, ոչ մի կապ չունի նման հերյուրանքների հետ: Բոլոր այն դեպքերում, երբ հռոմեացիների հնարագիտությունը հակադրվում է նրանց հակառակորդներ-

րի հիմնարկյանը, մենք կարող ենք վստահ լինել, որ գործ ունենք միտումնավոր կեղծիքի հետ, որը պատմական ոչ մի արժեք չի ներկայացնում»:

ՊԱՏՄԱԿԱՆ ՏԵՂԵԿԱՆՔ

Պատմիչների մի մասը՝ անտեսելով դեպքերի նկարագրությունը, կանգ է առնում հրամանատարների ու զորավարների գովերգման վրա յուրայիններին երկինք համելով, իսկ քննադատներին՝ չափազանց նսեմացնելով...

Պատմությունը տանել չի կարող ոչ մի տեսակ, անգամ պատահական ու անշան սուտ... Դեքիաթային պատմություններն ամենևին էլ չեն զարդարում պատմությունը... եք իհարկե, դու ի նկատի ունես ոչ թե ամեն տեսակի թափրջփուկների, այլ մարդկանց, որոնք լսում են խստապահանջ դատավորի պես. [ըրանք] կուշտ կծիծաղեն, եթե տեսնեն, թե ինչ արհեստական ձևով են այդ գործում սոսնձված այլաժին և իրար չհամապատասխանող մասերը...

Դիչիր հետևյալը լավ է, եթե գրես հետագա սերունդների համար [այնպես], որ քո մասին ևս ասեն. «Սա, իրոք, ազատ մարդ էր, անկաշառ, հեռու կեղծավորությունից ու ստրկամտությունից»...

*ԼՈՒԿԻՆՆՈՍ ՍԱՄՈՍՏՏԻ,
հռոմեացի պատմիչ (II դար)*

Սակայն ինչո՞ւ էին հռոմեացի պատմիչները ծիծաղելիության աստիճանի հասնող ստեղծերի հորինում, ինչը քննադատվել է նաև հենց իրենց՝ հռոմեական պատմագրության ուրիշ ներկայացուցիչների կողմից: Պատասխանը մեզ համար ավելի քան հստակ է. դա պետք էր հռոմեական կրթական համակարգին, հարկավոր էր թեկուզև ստերով կերտել իդեալական հերոսների կերպարներ, որոնց դեմ միշտ ջախջախվել կամ խոնարհվել են քննադատները: Այդ հերոսներով Հռոմի քաղաքացիները պետք է դաստիարակվեին մանուկ հասակից՝

իդեալներ ունենալով աչքերի առաջ: Ոչ վաղ անցյալում նույն երևույթին ականատես եղանք խորհրդային բռնատիրության կրթահամակարգի օրինակով... (Առանց ստերի, իրական իդեալ-կերպարներով դաստիարակության համակարգի կարիք այսօր մենք ունենք առավել քան երբևէ)...

*Նկար 25 Արժիկ արձանիկ Արտաշատից
(Ջ.ա. I-II դդ.)*



ՏԻԳՐԱՆԿԵՐՏԻ ՃԿԱՏԱՄԱՐՏԻ ՀՆԱՐԱՎՈՐ ԲԱՅԱՏՐՈՒԹՅՈՒՆԸ

Որքան էլ ակնհայտ է հռոմեացի պատմիչների միտումնավոր կեղծիքը, այդուհանդերձ, բոլոր աղբյուրներում նշվում է, որ հայոց զորքը սկզբում անհաջողություն է կրել: Սակայն ինչպես ցույց են տալիս հետագա իրադարձությունները, Տիգրան Մեծը ոչ միայն պահպանել էր զինված ուժերը, այլև դրանցով ջախջախեց հռոմեացիներին, ապա օգնեց Սիրիայի VI-ին՝ ազատագրելու Պոնտոսը:

Որը՞ կարող էր լինել ճակատամարտը տանուլ տալու պատճառը: Տարածված այն բացատրությունը, թե հռոմեացիներին հաջողվել էր աննկատ հայոց զորքի թիկունքն անցկացնել մի զորագունդ, որի անակնկալ հարձակումն առաջ բերեց խուճապ, խիստ անհավանական է: Հենց հռոմեացի պատմիչներն են վկայում, որ Տիգրան Մեծը Լուկոլլոսի հետ բախումից առաջ *քսանհինգ տարի պատերազմներ է մղել առանց պարտության* ուստի տրամաբանական չէ մտածելը, թե քառորդարյա փորձառությանը զորավարը կարող էր այդպիսի պարզունակ սխալ բույլ տալ՝ առանց հսկողության բողոքելով իր զորքի թիկունքը: Իսկ ի՞նչ բացատրություն կա՝ որոշ է ունենալ կատարվածը:



Կարելի է ենթադրել, որ հայկական բանակի ինչ-որ մի հնարք այնպիսի տավափորություն է ստեղծել հռոմեացիների մոտ, թե հայոց զորքը ոչնչացել է: Երբ փորձում ենք խորամուխ լինել, հասկանում ենք, որ Տիգրան Մեծը մարտադաշտում տեսնելով անբարենպաստ մարտական իրավիճակ, պետք է շատ արագ որոշում կայացրեր: Եվ նա կարող էր որոշել «արագ երթով» բանակը դուրս բերել մարտադաշտից, որն էլ, թերևս, հռոմեացիների մոտ հայոց զորքի «վերացման» տպավորություն է ստեղծել: (Նման մարտավարական քայլ հայոց բանակն արեց Գավգամելայի ճակատամարտում, երբ հերոսաբար մարտնչելով, բայց տեսնելով Դարեհ III-ի փախուստը, «արագ երթով» հեռացավ մարտադաշտից):

Հռոմեացի պատմիչ Մալյուստիոսը (Ք.ա. I դար) պահպանել է Միհրդատ Եվպատորի նամակը՝ ուղղված Պարթևատանի արքա Հրատիատ (Փրատատես) III-ին, որում Տիգրանակերտի ճակատամարտը ներկայացված է այսպես.

ՊԱՏՄԱԿԱՆ ՏԵՂԵԿԱՆՔ

Փոքր տարածության պատճառով [հռոմեացիները] Տիգրանի մեծաթիվ ուժերին չբողեցին մարտի մեջ մտնել, և նրա չկշռադատված քայլն էլ ներկայացնում են որպես իրենց հաղթանակ:

*ՍԱԼՅՈՒՄՏԻՈՍ,
հռոմեացի պատմիչ (Ք.ա. I դար)*

Այսինքն՝ խոսքն այստեղ գնում է, քստ էուքյան, չկայացած ճակատամարտի մասին: «Փոքր տարածության պատճառով» հայոց զորքը, փաստորեն, չի մտել ճակատամարտի մեջ, այլ արագ հեռացվել է մարտադաշտից, ինչը Միհրդատ Եվպատորը համարում է «չկշռադատված քայլ»: Նույն նամակում Պոնտոսի արքան նաև նշում է, որ Տիգրանի տերությունը չի ենթարկվել լուրջ հարվածի...



ՏԻԳՐԱՆԱԿԵՐՏԻ ԱՆԿՄԱՆ ԳԱՍԵՐԸ

Լուկուլլոսին սպասվում էր ևս մեկ հաջողություն, որը, սակայն, նրա համար վերջինն էր լինելու այդ պատերազմում: Տիգրանակերտում գտնվող օտարազգիները դավադրությամբ բացեցին քաղաքի դարպասները և անպարտուկի մայրաքաղաքն ընկավ:

ՊԱՏՄԱԿԱՆ ՏԵՂԵԿԱՆՔ

Լուկուլլոսը Տիգրանակերտը զրավեց այնտեղ բնակեցված օտարների ապստամբության հետևանքով: Քանզի նրանց մեծ մասը կիլիկեցիներ էին, որոնք մի ժամանակ տեղահանվել էին իրենց երկրից, և այժմ զիշերով հռոմեացիներին ներս բողեցին:

*ԴԻՈՆ ԿԱՍՍԻՈՍ,
հռոմեացի պատմիչ (II – III դարեր)*

Բայց Լուկուլլոսը, վերադառնալով Տիգրանակերտ, պաշարեց քաղաքն ավելի համարձակորեն: Իսկ քաղաքում գտնվող Միհրդատի զորավարները, որ բոլորովին հուսահատվել էին, իրենց փրկելու համար քաղաքը հանձնեցին Լուկուլլոսին:

*ՄԵՄՆՈՆ,
պոնտացի պատմիչ (II դար)*

Տիգրանակերտում հելլեններն ապստամբել էին բարբարոսների դեմ քաղաքը Լուկուլլոսին հանձնելու նպատակով. ուստիև սա հարձակվեց ու զրավեց այն:

*ՊԼՈՒՏԱՐԲՈՍ,
հռոմեացի պատմիչ (I – II դարեր)*

Ինչպես տեսնում ենք, տարբեր աղբյուրներում որպես դավադիրներ նշվում են տարբեր ուժեր (կիլիկեցիներ, հույներ, արևտացի զորավարներ), բայց բոլորում շեշտվում է, որ դրանք օտարներ էին:

Մայրաքաղաք Տիգրանակերտի անկման պատմությունը դաս է հետագա սերունդներին համար, որ երբեք չի կարելի հայրենիքի պաշտպանությունը վստահել օտարին...

ՀՈՒՄԵԱԿԱՆ ԲԱՆԱԿԻ ՉԱՆՉԱՆՈՒՄՆ ԱՒ ՓԱՆՈՒՍՏԸ

Տիգրանակերտի առումը և թալանը որոշակի ոգևորություն առաջացրեց հռոմեացիների մոտ, ուստի Ք.ա. 68 թ. ամռանը Լուկուլլոսը որոշեց շարունակել առաջխաղացումը դեպի Արտաշատ: Արշավանքի նախնական ծրագիրը՝ մայրաքաղաքի անակնկալ գրավումով գերել թագուհուն և պարտադրել Տիգրան Մեծին՝ հանձնել Միհրդատ Եվպատորին, ձախողվել էր: Լուկուլլոսը Հայաստանում էր, սակայն նրա նահանջի ճանապարհները փակվել էին հայերի կողմից: Այստեղ ևս Լուկուլլոսն ուներ նույնպիսի ծրագիր, ինչ մեկ տարի առաջ՝ արքայի ընտանիքը գերելով՝ արշավանքն ավարտել:

ՊԱՏԱՄԱԿԱՆ ՏԵՂԵԿԱՆՔ

Այնժամ նա շարժվեց դեպի Արտաշատ՝ Տիգրանի մայրաքաղաքը, որտեղ գտնվում էին թագավորի մանկահասակ երեխաները և նրա կանայք.

*ՊԼՈՒՏԱՐՔՈՍ,
հռոմեացի պատմիչ (I – II դարեր)*

Ուշագրավ է, որ Հայոց տիրակալը 72 տարեկանում ուներ «մանկահասակ երեխաներ»...



Նկար 26. Տիգրան II Մեծի դրամը, որի երկրորդ երեսին ասկա են Մայր դիցուհի Անահիտի պատկերը և «Աղբյայից արքա Տիգրանի մականությունը

Տիգրան Մեծը հետևակի ղեկավարունը հանձնեց Միդի-դատ Եվպատորին, իսկ ինքը ստանձնեց հեծելազորի հրա-մանատարությունը: Թշնամին զրկվեց մատակարարման ու համալրման հնարավորությունից՝ հանկարծակի հարձա-կումների ենթարկվելով հայոց այրուձիի կողմից: Հայերի հանկարծակի գրոհները հռոմեացիներին զրկում էին կողմն-որոշվելու հնարավորությունից:

Հայկական Տավրոսի անցումից հետո Լուկուլլոսի բա-նակը հայտնվել էր Արածանիի հովտում, որտեղ էլ աշնանա-յին գիշերահավասարի՝ սեպտեմբերի 22-ի շրջանում տեղի ունեցավ վճռորոշ ճակատամարտը:

Արածանիի ճակատամարտում հռոմեական բանակը խայտառակ պարտություն կրեց: Հռոմեացիներն, ինչպես և սլավսելի էր, դա չեն ներկայացնում որպես պարտություն, այլ՝ իբր հռոմեացի զինվորները կարոտել էին հայրենիքը և ո-րոշել վերադառնալ հայրենիք:

ՊԱՏՄԱԿԱՆ ՏԵՂԵԿԱԼՔ

Ինչ վերաբերում է մեր զինվորներին՝ նրանց հաջողվել էր, իրոք, վերցնել մեկ քաղաք, որը գտնվում էր Տիգրանի թագավորության մեջ, և հաջողվել էր նույնպես հաղթություն տանել մի քանի ճակատամարտերում. սակայն այն կողմե-րի անչափ հեռավորությունը վատ էր ազդել նրանց վրա և հայրենիքի կարոտը սկսել էր նրանց հաղթահարել...

Թե ինչ պատահեց հետո՝ այդ մասին ես այլևս չեմ խո-սի: Բանը վերջացավ նրանով, որ մեր զինվորները, առաջ շարժվելու փոխարեն, պահանջեցին ետ դառնալ արագո-րեն:

ՅԻՑԵՐՈՆ,

հռոմեացի պետական գործիչ և փիլիսոփա (Ք.ա. II-I դարեր)

Ի տարբերություն Ցիցերոնի՝ Պլուտարքոսը հռոմեացի-ների պարտությունն ու նախանջը փորձում է «կոծկել» նաև անբարենպաստ եղանակային պայմաններով...

ՊԱՏՄԱԿԱՆ ՏԵՂԵԿԱԼՔ

Սակայն աշնանային գիշերահավասարի ժամանակ ե-ղանակն անսպասելիորեն սաստիկ փչացավ: Գրեթե անընդ-հատ ձյուն էր տեղում, իսկ երբ երկինքը պարզվում էր, այն-ժամ եղյամ էր նստում և սառցակայում էր: Չիտրը հագիվ էին կարողանում խմել սառցակայած ջուրը. նրանք դժվարու-թյամբ էին անցնում սառած գետը, քանի որ սառույցը ճղում էր և կտրում նրանց ջլերը:

ՊԼՈՒՏԱՐՔՈՍ,

հռոմեացի պատմիչ (I – II դարեր)

Սա նույնքան ծիծաղելի է, որքան Տիգրանակերտի ճա-կատամարտում հռոմեացի 5 գոիի դիմաց հայերի տված 150 հազար զոհը... Ով ծանոթ է Հայաստանում, քաջ գիտի, որ աշնանային գիշերահավասարի՝ սեպտեմբերի 22-ի շրջա-նում եղանակը դեռևս ամառային է, իսկ «անընդիատ ձյուն և «առած գետեր՝ նոյեմբերին անգամ հագվադեպ են լինում...

Եղանակի հանկարծակի փոփոխության ու հայրենիքի կարոտի հեքիաթները Հռոմում հորինվել են, որպեսզի չա-սանվի հավատը սեփական զորքերի նկատմամբ...



Նկար 27. Հեռյալների արձանիկներ Արտաշատից (I-II դդ.)

Իսկ իրականությունը, պատմված փոքրասիական ծագումով համեմատաբար չեզոք պատմիչի երկում, հետևյալն է.

ՊԱՏՄԱԿԱՆ ՏԵՂԵԿԱՔ

Այս ընդհարման ժամանակ հռոմեացի հեծյալներից բշնամու հեծելազորը դժվար դրության մասնեց... Թշնամիները որևէ վնաս չկրեցին. այլ նրանք ետ դառնալով և հետապնդողներին նետահարելով, շատերին իսկույն սպանեցին, իսկ շատ շատերին էլ վիրավորեցին: Ու վերքերը ծանր էին և դժվար բուժելի. քանզի նրանք զործածում էին երկծայր նետեր, և ծայրերը այնպես էին իրար ազուցված, որ նետերը թե մարմնի որևէ մասում մնալու և թե դուրս քաշվելու դեպքում, արագորեն սպանում էին, որովհետև երկաթյա ծայրերից մեկը, որը չէր ամրացված, մնում էր վերքի մեջ:

Այնժամ Լուկուլլոսը, քանի որ շատերը վիրավորվում էին և մի մասն էլ մահանում էր, իսկ հաշվածները հեծեծում էին, և միաժամանակ պարենամթերքը պակասում էր, նահանջեց այդտեղից...

ԴԻՈՆ ԿԱՍՍԻՈՍ,
հռոմեացի պատմիչ (II – III դարեր)

Լուկուլլոսի ղեկավարած հռոմեական բանակի խաչատառակ պարտության գնահատականներից մեկն էլ այն եղավ, որ Հռոմի սենատը պաշտոնաճակ արեց Լուկուլլոսին, երբ նա դեռ նահանջի ճանապարհին էր:

Ուշագրավ է, որ Լուկուլլոսի արշավանքը լուրջ ուշադրության չի արժանացել հայկական ավանդական պատմագրության մեջ: Մովսես Խորենացու «Հայոց պատմության» էջերում Լուկուլլոսը համարվում է ընդամենը «ինչ-որ մի ավագակ», որը «վրդովում էր Հայոց աշխարհը»...

ՀԱԿԱՀՈՍՏԵԱԿԱՆ ԱՐՇԱՎԱՆՔԸ ԵՎ ԴՐԱ ՉԱՆՈՂՈՒՄԸ

Լուկուլլոսի արշավանքն ավարտվեց հռոմեական բանակի շախմատմամբ և Հայաստանից վտարմամբ: Ք.ա. 67 թ. Հայոց զորքերի օգնությամբ Միհրդատ Եվպատորն ազատագրեց Պոնտոսը՝ դուրս մղելով այնտեղից հռոմեացիներին: Դրան հետևեց հայկական զորքերի կողմից Կապադովկիայի, իսկ Միհրդատ Եվպատորի կողմից (որի զորքի զգալի մասը տրամադրել էր Տիգրան Մեծը)՝ Բյուրանիայի գրավումը:

ՊԱՏՄԱԿԱՆ ՏԵՂԵԿԱՔ

Միհրդատը խուսափում էր Լուկուլլոսին ճակատամարտ տալուց, սպասելով Տիգրանին, որը մեծ ուժերով գալիս էր միանալու նրան, և Լուկուլլոսը որոշեց շարժվել Տիգրանին ընդառաջ ու նրա հետ մարտի բռնվել, նախքան իր երկու բշնամիները դարձյալ կմիանային: Սակայն ճանապարհին զինվորները խռովություն բարձրացրին և լքեցին իրենց դիրքերը զորաշարքերում...

Լուկուլլոսը ստիպված եղավ հաշտվել այն մտքի հետ, որ Տիգրանը ամայացնում էր Կապադովկիան, որ Միհրդատը վերագտել էր իր հանդգնությունը, այն Միհրդատը, որի մասին սենատին զեկուցել էր, թե նրա հետ ամեն ինչ վերջացած է: Լրա այդ զեկուցից հետո Գոմոնից ուղարկվել էին տասը պաշտոնատար անձինք՝ Պոնտոսում գործերը կարգավորելու համար՝ այն համարելով վերջնականապես նվաճված երկիր. բայց երբ նրանք տեղ հասան, հանդվեցին, որ Լուկուլլոսն անգամ ինքն իր զլխի տեղը չէ. զինվորներն իրենց ցանկությամբ բռնադատում են նրան:

ՊԼՈՒՏԱՐՔՈՍ,
հռոմեացի պատմիչ (I – II դարեր)



Դատելով հայկական և պոնտական ուժերի արևմտյան ռազմերից՝ Տիգրան Մեծն ու Միհրդատ Եվպատորը նախատեսում էին մեծ արշավանք սկսել Հռոմի դեմ Փոքր Ասիայի, (հնարավոր է նաև Միջերկրականի արևելյան) տարածքներում: Դժվար է ասել, թե ինչ ընթացք կունենար պատմությունը, եթե իրականանար նման մի արշավանք: Սակայն դա տեղի չունեցավ, ծախողվեց, ինչի պատճառը միջազգային իրադրության փոփոխությունն էր և հայոց արքայազն Տիգրան Կրտսերի բարձրացրած խռովությունը:

ՊՈՄՊԵՈՍԸ ԱՐԵՎԵԼՔՈՒՄ

Հայաստանում կրած պարտության համար Լուկոլլոսը պաշտոնանկ արվեց և նրա փոխարեն արևելք ուղարկվեց Պոմպեոս գորավարը: Նրան հաջողվեց ծովում հաղթանակ տանել կիլիկյան ծովահենների նկատմամբ, ինչը զգալիորեն ուժեղացրեց Հռոմի դիրքերը Միջերկրականի արևելքում:

Ք.ա. 67 թվի աշնանը Պոմպեոսն ափ իջավ Կիլիկիայում: Դիոն Կասսիոսի հաղորդման համաձայն՝ նա փորձեց բանակցել Միհրդատ Եվպատորի հետ, սակայն մերժում ստացավ, քանի որ վերջինս հույս ուներ ստանալու պարթևների արքա Հրահատ (Փրասառես) III-ի դաշնակցությունը: Պոմոսացու ծրագիրը, սակայն, ձախողվեց:

Պոմպեոսին հաջողվեց իր կողմը գրավել Պարթևստանի արքա Հրահատ III-ին, որը ձգտում էր վերժխնդիր լինել հայերից և հետ բերել իր երկրի տարածքային կորուստներն ու միջազգային դիրքը Առաջավոր Ասիայում: Փաստորեն, վերականգնվեց Ք.ա. 92 թ. կնքված դաշինքը, որի համաձայն՝ հռոմեա-պարթևական սահմանն անցնելու էր Եփրատով:

Պետք է ենթադրել, որ Ք.ա. 67 թ. աշնանը Պոմպեոսը միաժամանակ բանակցությունների մեջ է մտել նաև Տիգրան Մեծի հետ՝ մեղադրելով Լուկոլլոսին Հայաստանի դեմ դուրս գալու համար (ինչպես դա անում էր մեկ տարի անց՝ Արտա-



շատի բանակցություններում): Տիցերոնի հաղորդման համաձայն՝ Պոմպեոսի հայտնվելը Կիլիկիայում «պանդաղեցրեց Տիգրանի շարժումը»:

Դատելով փաստերից՝ Տիգրան Մեծը շատ սրափ էր գնահատում ստեղծված միջազգային իրադրությունը և հակված էր խաղաղության հաստատմանը (ինչի համար էլ «դանդաղեցրեց շարժումը»): Միհրդատ Եվպատորը, քստ էության, գոյություն չունեի առանց Տիգրան Մեծի, մինչդեռ Հայաստանի դեմ ստեղծված հռոմեա-պարթևական ռազմական խմբավորումը բավականին հզոր էր:

Սակայն հայոց տիրակալին սպասվում էր մեծ անակնկալ: Հայ ափագանու մի մասը, որ հակված էր շարունակելու պատերազմը, Տիգրան Կրտսերի գլխավորությամբ խռովություն բարձրացրեց...



Նկար 28. Պոմպեոս

ՏԻԳՐԱՆ ԿՐՏՍԵՐԻ ԱՊՍԱՄԲՈՒԹՅՈՒՆ

Պատմիչները նշում են, որ խռովարարների հետևում կանգնած էր Միհրդատ Եվպատորը, որին անհրաժեշտ էր պատերազմի շարունակությունը: Արյություններում շեշտվում է նաև, որ Տիգրան Կրտսերը Միհրդատ Եվպատորի բռն էր՝ ծնված Կելոպատրայից:

Խռովությունը ճնշվեց, սակայն ապստամբ իշխաններն արքայազնի գլխավորությամբ հեռացան Հրահատ III-ի մոտ: Դա, հավանաբար, կատարվեց Միհրդատ Եվպատորի ցուցումով, որը հույս ուներ Տիգրան Մեծի փոխարեն իր բոն Տիգրան Կրտսերին գահ բարձրացնելով՝ ստեղծել հայ-պարթև պոնտական դաշինք ընդդեմ Հռոմի: Հրահատ III-ը, չնայած

Պոմպեոսին տրված իր խմստմանը, դեռևս ձեռնպահ էր մնում վճռական գործողություններից: Նա որոշեց երկալի խաղ սկսել՝ առավելագույնս օգուվելու բարենպաստ իրավիճակից: Նա արշավեց դեպի Արտաշատ՝ դրամով կատարելով հռոմեա-պարթևական դաշինքով ստանձնած պարտավորությունները, սակայն մինչ այդ Տիգրան Կրտսերին կնուրյան տվեց իր դստերը՝ իր փեսային Մեծ Հայքի արքա դարձնելու հեռանկարով, ինչը կապահովեր հայերի պարթևամետ դիրքորոշումն ապագայում:

Ք.ա. 66 թվի սկզբին, ըստ պայմանավորվածության, հռոմեական զորքերը Պոմպեոսի գլխավորությամբ արշավեցին Պոնտոսի դեմ, իսկ պարթևական զորքերը՝ Հայաստան: Պոմպեոսը կարողացավ պարտության մատնել Միհրդատ Եվպատորին և փախուստի մատնել նրան իր երկրից: Միհրդատն այս անգամ ապաստան գտավ իր որդու մոտ՝ Բուժոբի թագավորությունում՝ ներկայիս Ղրիմի տարածքում, և Ք.ա. 63թ. ինքնապաճուրկությամբ վերջ դրեց իր կյանքին:

Մինչդեռ պարթևական զորքը, որն արշավել էր դեպի Արտաշատ, պարտություն կրեց և դուրս շարվեց Հայաստանից: Երկամախնդիր արքայազնը բռնեց փախուստի ճանապարհը դեպի Պոնտոս, սակայն ճանապարհին լուր ստացավ, որ Միհրդատ Եվպատորն ինքն է պարտություն կրել Պոմպեոսից և վտարվել Պոնտոսից: Տիգրան Կրտսերը որոշեց ապավինել Հրահատ III-ի ու Պոմպեոսի դաշինքին և գնաց վերջինիս մոտ: Պոմպեոսը, բնակարար, որոշեց օգտագործել այս պատեհությունը Տիգրան Մեծի հետ սպասվելիք հարաբերություններում:



Նկար 29.
Պարթև արքա
Հրահատ III-ի
դրամները

ՊՍՄԱԿԱՆ ՏԵՂԵԿԱՆՔ

... Տիգրանը՝ Տիգրանի որդին, վերցնելով իր հետ հզորներից ոմանց, որովհետև նրանց հաճելի չէր ծերունու իշխանությունը, փախավ Փրասատեսի մոտ. և մինչդեռ սա Պոմպեոսի հետ կնքված դաշինքի պատճառով մտածում էր իր անելիքի մասին, համոզեց նրան ներխուժել Յայաստան: Եվ նրանք եկան մինչև Արտաշատ... Երբ պարզվեց, որ (քաղաքի) պաշարման համար ժամանակ էր պետք, Փրասատեսը զորքերի մի մասը թողնելով (Տիգրանի) որդուն, վերադարձավ իր հայրենի երկիրը. այնժամ էլ հայրը դուրս եկավ արդեն մեծակ մնացած որդու դեմ և հաղթեց. իսկ նա փախչելով, նախ ուղևորվեց դեպի Միհրդատը իր մեծ հայրը, բայց երբ իմացավ, թե նա պարտվել է և ավելի շուտ ինքն է օգնության կարիք գգում, քան թե ի վիճակի է ուրիշին օգնելու, գնաց հռոմեացիների մոտ. և Պոմպեոսը նրան օգտագործելով իբրև առաջնորդի, արշավեց Յայաստան, նրա հոր դեմ:

Այնժամ Միհրդատը շտապեց դեպի Տիգրանը. բայց երբ նրա մոտ նախ բանազնացներ ուղարկեց, ոչ մի սիրալիություն չհանդիպեց, քանի որ (Տիգրանի) որդին Տիգրանը, ապաստմբել էր (հոր) դեմ, իսկ սա կասկածում էր, որ Միհրդատը, լինելով նրա պապը, հրահրել էր այդ վեճը իր դեմ: Ուստի և Տիգրան (արքան) ոչ միայն չընդունեց նրան, այլև նրա կողմից եկած բանազնացներին կալանավորեց ու բանտարկեց: Միհրդատը հուսախաբ լինելով՝ շուտ եկավ դեպի Կոլխես...

ԴԻՈՆ ԿԱՍՍԻՈՍ
հռոմեացի պատմիչ (II – III դարեր)

Անտիկ պատմագրության պահպանած տեղեկությունները մեզ մղում են մտածելու, որ Տիգրան Մեծի ծրագրերի

ձախողման գործում բացասական մեծ նշանակություն ունեցավ արքայազն Տիգրանի ապստամբությունը: Եշմարտության դեմ շնեղանչելու համար նշենք, որ այդ պատմագրության էջերը գերծ չեն հորինված ու չինձու պատմություններից, որոնց առիթ ունեցանք անդրադարձնալու: Ուստի չի բացառվում, որ Տիգրան Կրտսերի պարագայում էլ լինեն հորինված կամ կեղծված տեղեկություններ: (Ն. Ադոնցն, օրինակ, հակված էր կարծելու, որ արքայազնը փորձում էր իրականացնել բազմաթաղ դիվանագիտական առաքելություն՝ խուսանավելով տարբեր ուժերի միջև՝ ոչ առանց հոր գիտության):

Այդպես մտածելու առիթ է տալիս մեզ փաստական մի անհամապատասխանություն: Ըստ հռոմեացի պատմիչների՝ Պոմպեոսն Արտաշատի պայծանագրի կնքման ժամանակ ձեռքակալեց Տիգրան Կրտսերին և կալանավորած տարավ Հռոմ, որտեղ նա մասնակցեց Պոմպեոսի հաղթահանդեսին, իսկ Ք.ա. 58 թ. փախուստի փորձ կատարելիս սպանվեց: Այսինքն՝ Ք.ա. 66-58 թ. Տիգրան Կրտսերը պետք է լիներ հռոմեական գերության մեջ, մինչդեռ հրեա պատմիչ Հովսեպոս Փլավիոսը տեղեկացնում է, որ Ք.ա. 64 թ. Տիգրան Կրտսերն առաջնորդում էր պարթևական բանակը՝ Սիրիայի տարածքում պատերազմելով հռոմեացիների դեմ...

ԱՐՏԱՇԱՏԻ ՊԱՅՄԱՆԱԳԻՐԸ. ՏԻԳՐԱՆՅԱՆ ՁԻՋՈՒՄՆԵՐԻ ԽՈՐՀՈՒՐԳԸ

Ք.ա. 66 թ. առաջին կեսին երկու ռազմական ճամբարների միջև պատերազմները սղվեցին երկու ճակատով: Հռոմեա-պոնտական ճակատում հաղթեցին հռոմեացիները, իսկ պարթևա-հայկական ճակատում՝ հայերը:

Հրահատ III-ի ծրագրերը լիովին ձախողվեցին: Պոմպեոսի համար այս իրադրությունը դարձավ ճակատագրի պարզև. Հռոմի շահերից չէր բխում արևելքում Պարթևստանի հզորացումը՝ ի հաշիվ Հայաստանի բուլացման: Եստ ավելի

շահեկան էր Հռոմի համար ունենալ Մեծ Հայքն իբրև դաշնակից, մանավանդ, որ Տիգրան Մեծը խզել էր բոլոր կապերը Սիրիդատ Եվպատորի հետ: Այս իրավիճակում սկսվեցին բանակցություններ, որոնք ավարտվեցին Ք.ա. 66 թվականին Արտաշատի պայծանագրի կնքմամբ:



Նկար 30. Ավերակ կամուրջ Տիգրանակերտի ճանապարհին (Արևմտյան Տիգրիս, Հասանբեյի հնավայր)

Երկու հաղթող երկրների՝ Հայաստանի և Հռոմի միջև Տիգրան Մեծի և Պոմպեոսի կողմից ստորագրվեց հաշտության պայծանագիր, որով Հայաստանը հօգուտ Հռոմի հրաժարվեց Եփրատից արևմուտք ընկած իր նվաճումներից, Պարթևստանին վերադարձրեց նախկին սահմանները: Մեծ Հայքը ճանաչվեց Հռոմի «դաշնակից և բարեկամ», ինչը ենթադրում էր ռազմական փոխօգնություն: Տիգրան Կրտսերը պետք է բազավորեր Ծոփքում և Կորդուքում, իսկ հոր մահից հետո՝ ամբողջ Մեծ Հայքում, ինչը չիրականացավ, քանի որ նա ձեռքբերակալվեց և արտրվեց Հռոմ:

Ինչո՞ւ Տիգրան Մեծը գնաց նման զիջումների:

Չէ՞ որ նա հաղթել էր հռոմեացիներին Ք.ա. 69-68 թթ. լուկուլլոսյան պատերազմում, Պոմպեոսի հետ դեռևս բախում չէր ունեցել, իսկ Պարթևստանի գորբերին հերթական ու վերջին ջարդը տվել էր հենց Ք.ա. 66 թվականին:



Առաջին հայացքից անհասկանալի թվացող այս լուծու՝
մը կարող է բացատրվել Տիգրան Մեծի հայրենապաշտու՝
յամբ: Նա իսկապես հարթանակող էր, սակայն պարտվել և,
փաստորեն, ասպարեզից դուրս էր մղվել Հայաստանի դաշ՝
նակից Պոնտոսը: Եվ Հայաստանը պատերազմը շարունա՝
կելու դեպքում կարող էր մնալ միայնակ ընդդեմ Հռոմի և
Պարթևստանի, այն ժամանակների ընկալմամբ՝ «միայնակ՝
ընդդեմ ամբողջ աշխարհի»: Նա կարող էր շարունակել պա՝
տերազմը հանուն տիրակալի իր փառքի, բայց դրանով
կվտանգեր իր հայրենիքի ապագան: **Երբ կշեռքի մտարմների՝
դրված էին տիրակալի իր փառքն ու հայրենիքի ապագան,
Տիգրան Մեծն ընտրություն կատարեց հանուն հայրենիքի...**

Նա որոշեց հրաժարվել իր նվաճած տարածքներից՝
լիովին պահպանելով Մեծ Հայքի թագավորությունը և Հյուսի՝
սային Միջագետքը:

Հռոմեացիները ցնծությանը ընդունեցին Տիգրան Մեծի
հաշտության պայմանները և սկսեցին սիրաշահել նրան:
Զմայած հռոմեացի պատմիչների գոռոզամիտ արտահայ՝
տություններին, սա ակնհայտ է դառնում մաև այն փաստից,
որ Հյուսիսային Միջագետքն ու Կորդվաց աշխարհը Հռոմի և
Պարթևստանի նախնական համաձայնությանը պետք է
անցնեին պարթևներին, սակայն հռոմեացիները սկսեցին ա՝
մեն ինչ անել, որպեսզի այդ տարածքները մնան Տիգրան Մե՝
ծի տիրության սահմաններում, և դրանք մնացին:

Արտաշատի պայմանագրով Տիգրան Մեծն ավարտեց
իր պատերազմական կենսագրությունը և մինչև Ք.ա. 55 թվա՝
կանն իշխեց խաղաղությանը՝ արքայից արքա տիտղոսը փո՝
խանցելով իր ժառանգներին:

ՅԻՑԵՐՈՒԸ՝ ՏԻԳՐԱՆ ՄԵԾԻ ՄԱՍԻՆ

Տիգրան Մեծի ժամանակակից միակ հռոմեացին, որի
գրվածքները հասել են մեզ, ականավոր պետական գործիչ և



փիլիսոփա Մարկոս Տուլիոս Ցիցերոնն է: Ընթերցենք Տիգրան
Մեծին բնութագրող հատվածներ նրա ճառերից.

ՊԱՏԱՎԱՆ ՏԵՂԵԿԱՆՔ

(Միհրդատ Եվպատորին), որ վախեցած էր ու փախստական, Տիգրանը հայոց թագավորը, ընդունեց, հավատը նրա գործերին ամրապնդեց, բեկվածին բարձրացրեց, հուսալքվածին քաջալերեց:

«Գնեսու Պոնպեոսի գերագույն հրամանատարության մասին» ճառից (Ք. ա. 66 թ. հունվար)

Մենք ինքներս վերջերս վարել ենք Հայոց թագավոր Տիգրանի դեմ երկարատև և ծանր պատերազմ, քանզի նա անօրենություններ գործելով մեր դաշնակիցների հանդեպ, կարելի է ասել, պատերազմ է սանձագերծել մեր դեմ:

Եվ նա անձամբ ինքնին շատ զորեղ (vehemens) էր և մեր տերության ոխերիմ թշնամուն Պոնտոսից վտարված Միհրդատին, պաշտպանեց իր զորքերով և իր թագավորության մեջ...


Այսպիսով նա (Տիգրանը), որը ինքը Հռոմի ժողովրդի թշնամի էր, որն ընդունել էր մեր չարագույն ուղիսին իր թագավորության մեջ, որը բախման մեջ էր մտել մեզ հետ, որը մարտի էր բռնվել, որը պայքարեց գրեթե տիրակալության համար, այժմ թագավորում է և օգտվում նրանց բարեկամի և դաշնակցի կոչումից, ում նա ինքն իր գեներով բռնացել էր:

«Ի պաշտպանություն Պուրլիոս Սեստիոսի» ճառից (Ք. ա. 56 թ. մարտ)

Հայոց տիրակալին տրված ցիցերոնյան բնորոշումը՝ «vehemens», Հռոմում քաղաքական գործիչներին բնութագրող բարձրագույն գնահատականն էր, որով հատկանշվում

էին տվյալ անձի հոգևոր արժանիքները, ֆիզիկական ուժը, նրա եռանդը և համակողմանի քաջատիրությունը:

*Նկար 31.
Մարկոս Տալիոս Եփեսոս*



ՏԻՎՐԱՆՅԱՆ ՏԵՐՈՒԹՅԱՆ ԿԱՌՈՒՅՎԱԾԷ

Հայոց պետականությունը Տիգրան Մեծից առաջ անցել էր զարգացման հազարամյակներ: Գեոեոս Ք.ա. XXVIII-XXVII դարերում Հայաստանում հիշատակվում է վաղ բնակրատական պետություն (Արատոս), իսկ Ք.ա. IX դարում ստեղծված Վանի տերությունը ոչ միայն միավորում է ողջ Հայկական լեռնաշխարհը, այլ դառնում է Առաջավոր Ասիայի հզորագույն տերությունը:

Տիգրան Մեծից առաջ Մեծ Հայքն ուներ պետական կառավարման մի համակարգ, որը հարատևեց նաև նրանից հետո՝ մինչև Արշակունյաց թագավորության անկումը (428 թ.):

Պետության գլուխ կանգնած էր արքան՝ քաջարձակ միապետը, որը երկրի գերագույն սեփականատերն էր և գործերի գլխավոր հիմնամատարը: Արքային կից գործում էր երկրի բարձրագույն խորհրդակցական մարմինը՝ Աշխարհաժողովը, որում ընդգրկված էին բոլոր խավերի ներկայացուցիչները՝ բարձրաստիճան ազնվականներից մինչև «առմիկ շինականք» և «դասապետք շինականաց»: Հոգևոր և դատական գերագույն իշխանությունը պատկանում էր գերագույն բրմին (քրմապետին), որը տնօրինում էր նաև կրթական գործը: Արքան երկիրը կառավարում էր արքունի գործակալությունների միջոցով, որոնք տնօրինում էին երկրի կյանքի տարբեր ոլորտներ (հազարապետություն, մարդկապետություն, թագադիր ասպետություն, սպարապետություն, արքունի թիվ-

նապահություն, սուրհանդակապետ, քաղաքների կառավարիչ, մատովակապետ և այլն): Գործակալություններն ունեին իրենց սպասավորները:

Մեծ Հայքից դուրս կառավարումը Տիգրան Մեծն իրականացնում էր երկու եղանակով: Եթե նվաճվող երկրի արքան առանց լուրջ դիմադրության ընդունում էր իր գերիշխանությունը, շարունակում էր մնալ գահին՝ հարկեր և զինուժ տրամադրելու պարտավորությամբ: Մի շարք տեղերում արքան նշանակում էր կառավարիչներ (Մովսիսներ՝ Մերուժանին, Ատրիսներ՝ Բագադատեսին, Հյուսիսային Միջագետքում՝ իր եղբայր Գուրասին):

Նվաճված երկրներն ունեին տեղական ինքնավարություն, ինչի մասին են վկայում փյունիկյան քաղաքների, նախկինում պարթևներին ենթակա և Տիգրան Մեծից կախյալ թագավորությունների ստացած ազատություններն ու սեփական դրամ հատելու իրավունքը: Տերության կառավարման այդ համակարգը Տիգրան Մեծը ժառանգել էր Վանի և Արեմնյան աշխարհակալություններից:

Տերության կառավարման մեջ կարևորագույն նշանակություն ունեին զինված ուժերը: Գետակով փաստերից՝ ռազմական բարեփոխումները եղել են նորահռչակ թագավորի առաջին ձեռնարկումներից:

Մենատին ուղղված Լուկուլլոսի գեկուցագրում ներկայացված է Տիգրան Մեծի բանակի կազմը և թվաքանակը՝ 300 հազար, ինչը վերաբերում է ողջ տերությանը: Բուն հայոց զորքի թիվը, դատելով «Ջորանամակից» և մատենագրական այլ աղբյուրներից, եղել է շուրջ 120 հազար:



*Նկար 32.
Լրծվի պատկերով ոսկյա մեդալյոն (Միսիան, Ք.ա. I դար)*

ՊԱՏՄԱԿԱՆ ՏԵՂԵԿԱՆՔ

Հիրավի, նա ուներ քսան հազար պարսավորներ և արդեղնավոր, հիսունհինգ հազար այրուձի, որից տասնյոթ հազարը զրահավորված էին (թվական այս տվյալը բերվում է սենատին հղված Լուկուլոսի զեկույցից), հարյուր հիսուն հազար ծանրագնե հետևազոր՝ տարբեր թվաքանակ ունեցող զորատեսակներում դասավորված: Այս ամենին գումարած երեսուներինգ հազար սակրավորներ, որոնք զբաղված էին ճանապարհներ անցկացնելով, կամուրջներ կառուցելով, գետերի մաքրմամբ, փայտահատությամբ և այլ կարգի աշխատանքներով, որոնց դասավորեցին զինվորների շարքերի հետևում՝ բանակին տալով ավելի ազդեցիկ տեսք և, միաժամանակ, ավելացնելով նրա հզորությունը:

ՊԼՈՒՏԱՐՔՈՍ,

հռոմեացի պատմիչ (I – II դարեր)

Տիգրանյան բանակի գլխավոր հարվածային ուժը ծանրագնե հեծելազորն էր՝ փառապանծ հայոց այրուձին, որի փառքը հարատևեց դարեր շարունակ...

ՄԱԿԱՌԻՔԱՅԻՆ ԿՅԱՆՔԸ

Տիգրանյան ժամանակաշրջանում հայոց դիցարանի մասին որոշակի պատմեցրացում են տալիս գրավոր աղբյուրներից (հատկապես Մովսես Խորենացուց) ստացված հաղորդումները և Անտիոքոս Երվանդունու (Ք.ա. 70-34 թթ.) կառուցած Նեմրոսի սրբավայրը:

Դիցարանի գլուխ կանգնած էր Հայր աստված Արամազդը, որին հաջորդում էին Մայր դիցուհին (Անահիտ), ապա քաջության աստված Վահագնը և Արեգ-Միիրը: Վերջինս

Նեմրոսի սրբավայրում նույնացված է դարուրյան և իմաստության Տիր աստծո հետ:

Հայանի երևույթ է, որ հելլենիզմի դարաշրջանում տեղական աստվածները նույնացվել են համապատասխան գործառույթներով հունական աստվածների հետ: Դա (կրոնական սինկրետիզմը) տեսնում ենք նաև Հայկազուն-Արտաշեսյանների դարաշրջանում (Արամազդ-Չես (Դիոս), Անահիտ-Արտեմիս, Նանե-Աթենաս, Վահագն-Հերակլես, Աստղիկ-Աֆրոդիտե, Միր-Հելիոս, Տիր-Ապոլլոն և այլն): Սակայն օտար աստվածների ոչ անունները, ոչ էլ պաշտամունքի տարրերը չարմատավորվեցին հայ իրականության մեջ՝ մնալով միայն վերնախավային դրսևորում:

Տիգրան Մեծի օրոք ստեղծվել է բավականին լուրջ գրավոր ժառանգություն: Այն բաղկացած է եղել մեհենագիր հուշարձաններից, հունարենով արձանագրված կորոզներից ու տարբեր առարկաներից, դրամներից և գրակիր այլ իրերից: Դժբախտաբար, դրանց մեծագույն մասի վերաբերյալ մենք այսօր ունենք միայն մատենագրական տեղեկություններ:

Մատենագիրները վկայում են, որ Հայկազուն-Արտաշեսյանների օրոք Հայաստանում լայն տարածում էին ստացել հունական գիրն ու գրականությունը: Ուշագրավ է, որ Տիգրան Մեծի օրոք հույն փիլիսոփա և պատմագիր Մետրոդորոս Սկեփսիացու կողմից հայոց արքունիքում գրվել է Տիգրան Մեծի պատմությունը, որը մեզ չի հասել: Տիգրան Մեծի արքունիքում է ստեղծագործել նաև Ամֆիկրատես Աթենացին՝ հեղինակը «Մեծ մարդկանց մասին» աշխատության, որի մեկ գլուխը նվիրված է եղել Տիգրան Մեծին: Դժբախտաբար, այս երկը ևս մեզ չի հասել:

Բացառիկ հետաքրքիր են Տիրան Հայկազնի մասին տեղեկությունները, որոնք անգնում քիչ են հայտնի: Տիգրանակերտի դավադրական անկումից հետո նա իբրև ռազմագերի տարվեց Հռոմ: Իր տաղանդի և իմացության շնորհիվ, սակայն, նա ոչ միայն ճանաչվեց Հռոմում, այլև դարձավ Յիցերոնի մտերիմը և ղեկավարեց նրա հիմնածրերականությունում ու ճարտասանության ակադեմիան Հռոմում:



Նկ. 33. Հայր ատոփած Արտավազի, Մայր դիզուտի, Կահագնի և Արեգ-Միներ-Տիբի արձանների զուխները Նեմրոսի սրբափայտում

Հայտնի է, որ մեծ բատրոններ են գործել Արտաշատում և Տիգրանակերտում, որոնցում ներկայացվել են նաև հույն բատերազիրների երկերը: Պլուտարքոսի հաղորդման համաձայն, Տիգրան Մեծի որդին՝ հայոց Արտավազ արքան, հունարեն լեզվով գրել է ողբերգություններ, ճառեր ու պատմական երկեր, որոնցից մի քանիսը հայտնի են եղել նաև հռոմեացիներին Քրիստոսի ծննդյան II դարի սկզբին:

ՊԱՏՄԱԿԱՆ ՏԵՂԵԿԱՆՔ

Տեղեկանալով, որ քաղաքում գտնվում էին մեծ բվով դերասաններ, որոնց Տիգրանը ամեն կողմից հրավիրել էր իր կառուցած բատրոնի հանդիսավոր բացմանը, Լուկուլյոսը օգտագործեց նրանց ի պատիվ իր հաղթանակի կազմակերպված խաղերում ու հանդիսություններում:

... Նրանք համաձայնվել էին, որ Արտավազի քույրը ամուսնանա Օրոդեսի որդու Բակուրի հետ, նրանք փոխադարձաբար իրար մոտ խնջույքներ ու կերուխում էին կազմակերպում, հաճախ հունական ներկայացումներ էին տրվում, քանի որ Օրոդեսին օտար չէին հունարեն լեզուն ու զրականությունը, իսկ Արտավազը նույնիսկ ողբերգություններ էր հորինում, գրում էր ճառեր ու պատմական երկեր, որոնց մի մասը պահպանվել է:

ՊԼՈՒՏԱՐՔՈՍ,

հռոմեացի պատմիչ (I – II դարեր)

Մշակույթի մասին խոսելիս՝ հարկավոր է ճշել ճարտարապետության և քանդակագործության խիստ բարձր մակարդակը, որի մասին կան և՛ մատենագրական, և՛ հնագիտական վկայություններ:

Մեզ են հասել երկու ժայռափոր քարձրաքանդակներ Տիգրանակերտի շրջանում և Հյուսիսային Միջագետքում

(Բոչատ և Բավիան հնավայրեր), որոնցում, ամենայն հավանականությամբ, պատկերված է Տիգրան Մեծը:



Նկար 34. «Գնոջ (խավանաբար՝ Ատողիկ դիցուհու) արձան Արտաշատից (Ջ.ա. II-III դդ.)»

«ՋՈՒԳԱԿՇԻՈՒՔ»

Հին աշխարհում ընդունված էր համեմատել մեծերին՝ նրանց արժանիքներն ավելի տեսանելի ու գնահատելի դարձնելու նպատակով: Նման համեմատական կենսագրությունները Ռակեդարում բարգանեցին «Ջուգակշիք»...

Բազմաթիվ ուսումնասիրողներ համեմատականներ են անցկացրել Տիգրան Մեծի և նրա ժամանակակից Միհրդատ Եվպատորի կերպարների միջև: Դրանցից հատկապես հիշատակության է արժանի ֆրանսիացի գիտնական Ռընն Գրուսեի դիպուկ գնահատականը.

...Հին Հայաստանը կհասնի իր ընդարձակման գազաթնակետին, և դա կլինի Տիգրան բազավորի օրը:

Սա մի չճանաչված մեծ իշխող է, որ, անկասկած, շատ ավելի մեծ արժանիքներ ունի, քան նրա ժամանակակից Միհրդատը, որով հիացել է պատմությունը, մանավանդ, եթե նկատի ունենանք, որ Միհրդատը փայլուն կերպով «ինքնապատկության մղեց իր պետությունը», մինչդեռ Տիգրանը իր ժողովրդի ապրելու իրավունքն ապահովեց հավիտենականությամբ համար:

Ռընն Գրուսե

Փորձենք համեմատություն անցկացնել տարբեր ժամանակներում ապրած երկու տիրակալների միջև. Տիգրան Մեծ և Նապոլեոն Բոնապարտ: Երկուսն էլ ստեղծեցին աշխարհակալություններ, և երկուսի ստեղծած տերություններն էլ փլուզվեցին իրենց աչքերի առաջ, քանի որ դեպքերի բերումով երկուսն էլ միայնակ մնացին ընդդեմ ամբողջ աշխարհի (իրենց ժամանակների ընկալումով):

Երբ Նապոլեոն Բոնապարտը հայտնվեց միջազգային մեկուսացման մեջ, նախընտրեց գործել հանուն տիրակալի իր փառքի: Դրանով դա անկման հասցրեց իր տերությունը, իր երկիրը դարձրեց բազմաթիվ երկրների բանակների ոտքի կոխան, որից հետո կատարեց նոր արկածախնդրություն՝ «100 օրը», ինչը դարձավ իր երկրին ոչինչ չտված բազմահազար ֆրանսիացիների արյունահեղության պատճառ...

Երբ Տիգրան Մեծը մնաց մեռակ Հռոմի և Պարթևստանի (ժամանակի ընկալումով՝ ամբողջ աշխարհի) դեմ, դեռևս անպարտելի էր և կարող էր շարունակել պատերազմը հանուն տիրակալի իր փառքի: Սակայն դրանով նա կարող էր վտանգել իր երկրի ապագան: Ուստի որոշեց ստորադասել տիրակալի իր փառքն ու ընտրություն կատարեց հանուն հայրենիքի: Նա հրաժարվեց իր նվաճումներից՝ լիովին պահպանելով հայրենի բազավորությունը և «աքքայից արքա» տիտղոսը ժառանգություն բողեց սերունդներին...

ԲԱՐԵՊԱՇՏ ՏԻՐԱԿԱԼԸ (ՎԵՐՋԱԲԱՆԻ ՓՈԽԱՐԵՆ)

Այսբանով ավարտենք անդադարձը Տիգրանյան դարաշրջանի իրադարձություններին: Մենք այն կատարեցինք, որպեսզի հասկանանք, թե մեր ժողովրդի հիշողության մեջ ինչն է և հատկապես տպավորված Տիգրան Մեծի կերպարը:

Եվ մեզ համար ուրվագծվեցին մի շարք պատասխաններ:

Տիգրան Մեծի կերպարն է ուղեկցում մեզ դարեր շարունակ, քանզի նա տիրակալ էր, որ բարբարոս չդարձավ: Նա մեծ նվաճող էր և նվաճումներում անգամ՝ ազատարար: Հզոր էր, քաջ ու խոհեմ, ծրագրում և իրագործում էր տասնամյակների հեռավորությամբ: Նրա հանդեպ սիրո ու հարգանքի պատճառով երկրի բնակիչները մրցում էին երկրի շենացման համար: Նա քարեպաշտ էր ու հայրենամակեր՝ պատրաստ զոհաբերելու տիրակալի իր փառքը հանուն հայրենիքի...

Տիգրան Մեծի կերպարն իր հետքը բողոք նաև օտարների հիշողության մեջ: Նրա մասին գրել են տասնյակ օտարազգի պատմիչներ և նոր ժամանակների բազմաթիվ ուսումնասիրողներ: Նրա կերպարին նվիրվել են բազում գեղարվեստական գործեր, որոնց մեջ՝ ավելի քան երկու տասնյակ օպերաներ:

Հռոմի ամենականավոր դեմքերից մեկը՝ Ցիցերոնը, սենատում արտասանած իր ճառերում Տիգրան Մեծին բնորոշում է՝ «vehemens» կոչելով, որը Հռոմում քաղաքական գործչին տրվող բարձրագույն գնահատականն էր: Նրանից քիչ ուշ ապրած նույնպես հռոմեացի մատենագիր Վելլետո Պատերկուլոսը Տիգրան Մեծին համարում է «*իր ժամանակի հզորագույն քազավորը*» և «*քազավորներից մեծագույնը*»... Մեկ այլ պատմիչ՝ Եվտրոպիոսը գրում է, որ Տիգրան Մեծը «*տիրակալում էր մեծ փառքով*», իսկ Պոմպեոս Տրոգոսը տեղեկացնում է, որ նրան մեծարում էին՝ կոչելով «*Աստված*»...

ԳՐԱԿԱՆՈՒԹՅԱՆ ՑԱՆԿ

Յանկն ամենևին չի հավակնում Տիգրան Մեծի մասին գիտական գրականության լիակատար տեղեկատու լինելու: Ներկայացված են Տիգրան Մեծի մասին հիմնական ուսումնասիրություններն ու աղբյուրները (կոտորակված հայերեն): Ավելի մանրամասն կարելի է տեսնել այս ցանկում նշված աշխատանքներում հղված գրականությունը:

Ալոբն Ն., Տիգրան Մեծ. Ռուսումնասիրություններ, Եր., 2010:

Առաքելյան Բ., Հին Արտաշատ, Եր., 1975:

Աստուրեան Հ.Յ., Քաղաքական վերաբերոթիւններ ընդմէջ Հայաստանի և Հռովմայ 190-էն մ.թ. մինչև 428 յ.թ. Վենետիկ, 1912:

Չարյան Ա., Ալեքսանդրներ հին և միջնադարյան Հայաստանի քաղաքաշինության պատմության, Եր., 1966:

Էլչիրեկյան Ժ., Հայաստանը և Սելևկյանները, Եր., 1979:

Էրհարդ Կ., Տիգրան Բ եւ Հայ-լուկայեան պատերազմները (աշխատասիրեց Հ. Գարեգին Գարսեֆիլեան), Վիեննա, 1926:

Լեո, Երկերի ժողովածու, հատ. I, Եր., 1966:

Կրկաշարյան Ս., Հին Հայաստանի և Փոքր Ասիայի քաղաքների պատմությանը դրվագներ, Երևան, 1970:

Կրկաշարյան Ս., Հին Հայաստանի պետական կառուցվածքը (մ.թ.ա. VI – մ.թ. IV դդ.), Եր., 2005:

Հակոբյան Հ.Պ., Տիգրան Մեծ, Եր., 2005:

Հայ ժողովրդի պատմության քրեատոմատիա, հատ. I, Եր., 2007:

Հայ ժողովրդի պատմություն, հատ. I, (ԳԱ հրատ.), Եր., 1971:

Հարությունյան Բ.Հ., Տիգրանակերտ մայրաքաղաքի տեղադրության հարցի շուրջ, «Հայկազեան Հայագիտական Հանդես», 1994, ԺԳ:

Հրանդ Զ. Արմեն, Մեծն Տիգրան, Գահիրե, 1957:

Մանանդյան Հ., Տիգրան Երկրորդը և Հռոմը, Եր., 1940 (վերահրատարակությունը՝ Եր., 1972; Երկեր, հ. Ա, Եր., 1977; ուսուխրես բարգձմությունը՝ Եր., 1943; ֆրանսերենը՝ Լիսաբոն, 1963):

Մանասերյան Ռ.Լ., Սպարտակի մոտ ժամանած հեծելազորի հարցի շուրջ (վարկած՝ Սպարտակի հետ Տիգրան Մեծի ռազ-

մական կապերի վերաբերյալ), «Պատմա-բանասիրական հանդես» (այսուհետ՝ ՊԲՀ), 2004, 3:

Մանասերյան Ռ.Լ., Տիգրան Մեծ. Հայաստանի պայքարը Հռոմի և Պարթևստանի դեմ, Եր., 1987 (երկրորդ հրատ.՝ Եր., 2007):

Մովսես Խորենացի, Հայոց պատմություն, Եր., 1981:

Մուշեղյան Խ., Դրամական շրջանառությունը Հայաստանում (մ.թ.ա. V դար - մ.թ. XIV դար), Եր., 1983:

Չամչյան Մ., Հայոց պատմություն, հատ. Ա, Վենետիկ, 1784 (Եր., 1985):

Պյոտարքոս, Կենսագրություններ, Եր., 2001:

Պտուկեան Ջ., Արտաշեսյան հարստության դրամները, Վիննա, 1983:

Սարգսյան Գ., Հելլենիստական դարաշրջանի Հայաստանը և Մովսես Խորենացին, Եր., 1966:

Սարգսյան Գ., Տիգրան Բ-ի տերությունը, ՊԲՀ, 1966, 1:

Ստրաբոն, Եր., 1940:

«Տիգրան Մեծ. Գահակալության 2100 ամյակ» միջազգային գիտաժողով, զեկուցումների հիմնադրույթներ, Աշտարակ, 2005:

Моммзен Т., История Рима, т. II-III, М., 2005.

Саркисян Г.Х., Тигранакерт, М., 1960.

Саркисян Г.Х., Свидетельство поздневавилонской хроники об Армении времени Тиграна, ՊԲՀ, 1991, 2.

Тирация Г., Портретное искусство Армении по монетам Тиграна II и Артавазда II, ՊԲՀ, 1973, 4.

Тирация Г., Культура древней Армении V в до н.э - III в. н.э., Ер., 1988.

Debevoise N.C., A Political History of Parthia, New York, 1968.

Gurzadyan V. and Vardanian R., Halley's comet of 87 BCE on the coins of Armenian king Tigranes?, "Astronomy & Geophysics", vol. 45, London, 2004.

Hümann K. und Puschtein O., Reisen in Kleinasien und Nordsyrien, Berlin, 1890.

Lehmann-Haupt C.F., Armenien einst und jetzt, Bd. 1, Berlin, 1910.

Markwart J., Südarmenien und die Tigrisquellen nach den griechen und arabischen Geographen, Wien, 1930.

Mommmsen Th., Die Lage von Tigranokerta, "Hermes", 1887, IX.

Nercessian Y.T., Armenian Numismatic Studies, Los Angeles, 2000.

Reinach Th., Mithridate Eupator roi de Pont, Paris, 1890.

ԲՈՎԱՆԳՎԱԿՈՒԹՅՈՒՆ

ԿերևոնոթՅՈՒՆ	3
ՀԱՅՈՑ ՊԱՏՄՈՒԹՅԱՆ ԱՇԽԱՐՀԱՎԱՍՏՈՒԹՅՈՒՆՆԵՐԸ	
ՏԻԳՐԱՆ II ՄԵԾԵՑ ԱՌԱՋ ԵՎ ՀԵՏՈ	5
ԱՇԽԱՐՀԱՎԱՍՏԱՎԱՆ ԻՐԱԴՐՈՒԹՅՈՒՆԸ ՏԻԳՐԱՆ II-Ի	
ԳԱՀԱՎԱՍՏՈՒԹՅԱՆ ՆԱԽՕՐՅԱԿԻՆ	9
ԱՐՔԱՅԱՆ ՏԻԳՐԱՆԸ	10
ՊԱՏԱՆ Դ-ԱՐՔԱՅԱՆԻ ՎԵՐԱԿԱՐՁՆ ՈՒ	
ԹԱԳԱԴՐՈՒԹՅՈՒՆԸ	12
ՇՈՓՔԻ ՎԵՐԱՄԻՎՈՐՈՒՄԸ ՄԵՇ ՀԱՅՔԻՆ ԵՎ	
ՀԱՅ-ՊՈՆՏԱԿԱՆ ԴԱՇԻՆԸ	13
ԿԱՊԱԴՆՎԿԻԿԱՆ ԱՌԱՋԻՆ ԱՐՇԱՎԱՆԸ	15
ՀՈՈՄ-ՊԱՐԹԵՎԱՏԱՆ ԴԱՇԻՆԸ ԸՆԴԳԵՄ	
ՄԵՇ ՀԱՅՔԻ ՈՒ ՊՈՆՏՈՍԻ	16
ԿԱՊԱԴՆՎԿԻԿԱՆ ԵՐԿՐՈՐԳ ԱՐՇԱՎԱՆԸ	19
ՊԱՐԹԵՎԱԿԱՆ ՄԵՇ ԱՐՇԱՎԱՆԸ ՄԵԿՆԱՐԿԸ	
ԳԻՍԱՏԿԻ ԽՈՐՀՈՒՐԸ	21
ՏԻԳՐԱՆՅԱՆ ԱՇԽԱՐՀԱՎԱՍՏՈՒԹՅԱՆ ԱՏԵՂՇՈՒՄԸ	22
ԿՈՍՄԱԳԵՆԵ-ԿԱՍՄԱՆԻ ՀԱՅՈՑ ԹԱԳԱՎՈՐՈՒԹՅՈՒՆԸ	26
ՏԻԳՐԱՆՅԱՆ ԿԱՄ ՀԱՅԿԱՆԸ ԹԱԳԻ ՇՄՈՒՄԸ	28
ՏԻԳՐԱՆ ՄԵՇԸ՝ ՍԵԼԵՎԿՅԱՆ ԳԱՀԻՆ	29
ԿԻԼԻԿԱՆ՝ ՏԻԳՐԱՆՅԱՆ ՏԵՐՈՒԹՅԱՆ ԿԱՋՄՈՒՄ	32
ԱՋԱՏՈՒԹՅՈՒՆ ԱՍԱՅՄԸ ԶԱՂԱՆԵՐԻ ՈՒ	
ԵՐԿՐԱՆԵՐԻ ԵՐԱՍԱԳԻՏՈՒԹՅՈՒՆԸ	34
ԱՋԱԿՅՈՒԹՅՈՒՆ ԵԳԻՊՏՈՍԻՆ	35
ՆԱՐԱԹԵՆ՝ ՏԻԳՐԱՆՅԱՆ ՏԵՐՈՒԹՅԱՆ ԿԱՋՄՈՒՄ	36
ՀՈՈՄԻ ԽԱՐԿԱՎԱՆԵՐԸ ԵՎ	
ՀԵՆԱՏԱՆԻ ԱՆՉԱՏՎՈՒԹՅՈՒՆԸ	37
ՏԻԳՐԱՆՅԱՆ ԱՇԽԱՐՀԱՎԱՍՏՈՒԹՅԱՆ ՍԱՀՄԱՆՆԵՐԸ	39
ՏԻԳՐԱՆ ՄԵՇԻ ԱՆՎԱՍԹ	
ՆՈՐ ԲԱՆԱՎԱՋՅՐԵՐԻ ՀԻՄՆՈՒՄԸ	42
ՕԳՆՈՒԹՅՈՒՆ ՍՊԱՐՏԱԿԻՆ	45
ԼՈՒԿՈՒՄԼԼՈՍ՝ ՏԻԳՐԱՆ ՄԵՇԻ ՄԱՍԻՆ	47
ԼՈՒԿՈՒՄԼԼՈՍԻ ԱՆԱԿԵԿԱՆ ՀԱՐՉԱԿՈՒՄԸ	49
ՀԱՏՈՒԿ ՆՇԱՆԱԿՈՒԹՅԱՆ ԳՈՐԾՈՂՈՒԹՅՈՒՆԸ	50
ՏԻԳՐԱՆԱԿԵՐՏԻ ՃԱԿԱՏԱՐՄՏԸ	51

Հոռոտեւծի ՊԱՏՄԱԳԻՐՆԵՐԻ ԿԵՂՇԱՐԱՐՈՒԹՅԱՆ ՆՊԱՏԱԿԸ	53
ՏԻԳՐԱՆԱԿԵՐՏԻ ԾԱԿԱՏԱՄԱՐՏԻ ՀՆԱՐԱՎՈՐ ԲԱՅԱՐՈՒԹՅՈՒՆԸ	55
ՏԻԳՐԱՆԱԿԵՐՏԻ ԱՆԿՄԱՆ ԴԱՍԵՐԸ	57
Հոռոտեւզւն ԲԱՆԱԿԻ ԶԱԽՉԱԽՈՒՄՆ ՈՒ ՓԱԽՈՒՄՏԸ	58
ՀԱԿԱՀՈՈՍԵԱԿԱՆ ԱՐՇԱՎԱՆՔԸ ԵՎ ԴՐԱ ԶԱԽՈՂՈՒՄԸ	63
ՊՈՄՊԵՈՍԱՆ ԱՐԵՎԵԼՔՈՒՄ	64
ՏԻԳՐԱՆ ԿՐՏՍԵՐԻ ԱՊՍԱՄՊՈՒԹՅՈՒՆԸ	65
ԱՐՏԱՇԱՏԻ ՊԱՅՄԱՆԱԳԻՐԸ: ՏԻԳՐԱՆՅԱՆ ԶԻՋՈՒՄՆԵՐԻ ԽՈՐՀՈՒՐԴԸ	68
ՑԻՑԵՐՈՆԸ՝ ՏԻԳՐԱՆ ՄԵԾԻ ՄԱՍԻՆ	70
ՏԻԳՐԱՆՅԱՆ ՏԵՐՈՒԹՅԱՆ ԿԱՌՈՒԹՎԱԾՔԸ	72
ՄՇԱԿՈՒԹԱՅԻՆ ԿՅԱՆՔԸ	74
«ՋՈՒԳԱԿՇԻՈՔ»	78
ԲԱՐԵՊԱՇՏ ՏԻՐԱԿԱԼԸ (ՎԵՐՉԱԲԱՆԻ ՓՈՒՆԱՐԵՆ)	80
ԳՐԱԿԱՆՈՒԹՅԱՆ ՑԱՆԿ	81

ԱՐՏԱԿ ՄՈՎՄԻՍՅԱՆ

ՏԻԳՐԱՆ ՄԵԾ

ԹԱԳԱՎՈՐՆԵՐԻՑ ՄԵԾԱԳՈՒՅՆԸ

*Մրրազրիչ՝ Երանուհի Դանիելյան
Քարտեզագիր՝ Գրիգոր Բեգլարյան*

ԵՐԵՎԱՆ - 2010
ԵՊՀ ՀՐԱՏԱՐԱԿՉՈՒԹՅՈՒՆ
Երևան, Ալեք Մանուկյան, 1